



5

9

355

BIBLIOTECA NAZIONALE  
CENTRALE • FIRENZE •

5, 9 355



TORBERNI BERGMAN

CHEMIAE PROF. UPSAL. ET EQUITIS  
AURATI REGII ORDINIS DE WASA;

*Acad. Imp. N. C. Regiarumque Academiar.  
et Societat. Upsal. Stockolm. Utriusque Lon-  
din. Goetting. Berol., Gothob. Lund. &c.  
Sodalis, Parisinae Correspondentis,*

SCIAGRAPHIA  
REGNI MINERALIS


SECUNDUM PRINCIPIA PROXIMA

DIGESTI.

EDITIO PRIMA ITALICA.



FLORENTIAE MDCCLXXXIII.



IN TYPOGRAPHIA AD SIGNUM ROBORIS  
Prope S. Mariam Majorem  
*Superiorum Permissu,*



B. L.

**A**micissimi Ferberi satisfactus desiderio levem mihi Regni mineralis adumbrationem, secundum principia proxima digesti, qua perfecta, Vir celeberrimus, ut typis eandem divulgare consentirem, petiit. Immatutum opus potius suppressendum initio existimaui, numerosas analyses, quae adhuc restant faciendae, in memoriam revocans. Regessit autem Dominus Ferber in hoc campo vastissimo perfectam nondum jure expectari ordinationem, solidisque semel jactis fundamentis struem impositam pro re nata in novis editionibus tuto corrigi, ut recentiora sensim postulant experimenta. Probe etiam perspexi hocce Systema citius fore absolutum, si plures oculatioresque Chemicici meam examinent Sciagraphiam, quam si solus illi perficiendae essem intentus.

tentus. Aliorum quidem censura varia emendabuntur vitia, quae longiori industria ipse forsitan tollere potuissem, sed modo ditetur scientia, per quem parum refert. Genera igitur et species jam exhibeo, exceptis appendicibus, quae ad meum Scopum proprie non pertinent, et generica tantum continent. Genera e principali principio ingrediente, species e diversitate miscelae deduxi. Varietates externam spectant faciem, quas ideo hac vice praetereo.

Postquam Manuscriptum miseram stannum sulphuratum indagare mihi licuit, et quidem duas species, quarum altera quadraginta circiter sulphuris centesimas, altera vero ejusdem viginti tantum fovet. Prior auri musivi faciem gerit, posterior autem antimonio sulphurato quodammodo est similis, quamvis hujus nihil insit. Utraque pauxillo cupri  
inqui-

*inquinata reperitur. E Nerchinskoi Siberiae hoc rarum minerale obtinui.*

*Quod ad terrain ponderosam attinet, magnam diu hanc inter, et plumbi calcem perspexi convenientiam, inveni etiam nuper methodum illius praecipitandae per alkali pblogisticatum, adeo, ut re vera metallicam putem, sed nondum reductio successit, et donec hac ratione certus determinetur locus, inter terras collocandam existimo.*

*Paucis interjectis annis, si Deus vitam viresque largitur, et locupletius, et adcuratius hoc rudimentum proditurum spero.*





## DE ORDINANDO SYSTEMATE

## MINERALOGICO NATURALI.

## §. 1.

**C**omplexus fossilium in tellure obvi-  
 rum, quae vel structura carent or-  
 ganica, vel non nisi deperdita gaudent,  
 uti petrefacta, **REGNUM MINERALE**  
 vocari solet.

## §. 2.

Ut fossilia rite cognoscantur, cer-  
 tis opus est criteriis, quibus semper et  
 ubique inter se distingui possunt. Scien-  
 tia haec tradens **MINERALOGIA** dici  
 suevit.

## §. 3.

Quemadmodum autem in Regno  
 Vegetabili plures adhibitae fuerunt me-  
 thodi, e radicibus, foliis, floribus, fru-

A 4                      tibus,

ctibus, ceteris, petita, ita etiam Mineralogi varias ingressi sunt vias. Et utile sine dubio fuit, ut e pluribus quasi punctis considerarentur corpora anorga, nam multiplicatis diverso respectu comparationibus, proprietatum convenientia vel discrepantia melius elucet.

§. 4.

Quam jam totius Scientiae finis primarius sit, ut fossilium cognitio in usum generis humani adducatur, per se patet, *illam methodum omnibus aliis palmam praeripere*, quae ipsam denudat compositionem, hac enim probe perspecta, quid illis effici queat intelligimus; naturam secundum nostra desideria optime flectimus, et vicissim nec vires, nec opes in iis frustra pertentandis consumimus; quae, salva rerum indole, fieri nequent.

In

## §. 5.

In regnis organicis insita a Creatore vis, adveniente idoneo pabulo, structuram explicat atque evolvit, quae in ovo vel semine fecundato delitescit praeparata. Cujusvis speciei familia varia ubique nutrimenta hauriunt, vehunt, perficiunt et dirigunt eodem modo, adeo ut compages et facies primitivae maneat eadem, nisi peculiares causae consuetum impediunt cursum, monstra procreantes, quod tamen rarissime accidit. Haec itaque principales externarum partium formae internis machinae facultatibus congruunt, et rite selectae instar notarum characteristicarum omnino inservire possunt.

## §. 6.

At fossilium genesis longe aliter se habet. Nullum vasorum systema particulas convenientes colligit, mutat, distribuit

sribait et secernit, sed casu, saepeque diversissimae, concurrentes sola attractionis virtute ligantur, pro re nata rarae vel densae, symmetricae vel inordinatae, idque modis per insensibiles gradus multifarie variantibus. Haec generalis contemplatio *minime fida pollicetur criteria, ab externa facie desumpta*. Sed horum praecipua accuratius consideremus.

§. 7.

*Color* maxime vacillat, aeque ac magnitudo. Non satis mirari possumus vim Naturae illatam, qua terrae a lapidibus sollicitè sejunguntur. Lapis nempe dati voluminis suum constituit genus, idem vero in pulverem redactus sub alio collocatur, quod ne quidem in eadem reperitur classe.

§. 8.

§. 8.

*Durities* non raro in eodem frustulo variat. Argilla mollis igne exsiccatur, et siliceam tandem acquirit duritiem. Steatites unguē rasilis, pluresque aliae materiae, eodem medio indurantur, idque interdum sine ullo ponderis decremento notabili, adeo ut totam diverforum graduum seriem peragrent absque alia miscelae mutatione.

§. 9.

*Textura* sane particularum et *forma externa* e corporis quasi medullis magis pendere videntur, sed primo tantum intuitu. Molecula nempe calcarea, globosa vel amorphae, accuratissime examinata ejusdem omnino indolis saepe reperitur, ac spathosa. Et alibi luculenter demonstravi, quod figuras sphaerolaceas, granaticas, hyacinthicas, dodæcaedras, et quae sunt reliquae, ex eadem  
non

non raro materie fingat natura (1). Si autem tanta formarum discrepantia fallit, quid ab aliis externis qualitatibus minus constantibus expectare licebit?

§. 10.

Non igitur sufficiunt characteres superficialiarii, et ne quidem illis terra calcarea ab omnibus aliis rite distingui potest, nam effervescētia cum acidis est nota chemica, et praeterea pluribus diversae indolis competens. Discernat, qui potest, e facie externa plumbum aeratum et phosphoratum ( §. §. 182. 183. ) ut alia taceam exempla.

§. 11.

Abfit tamen omnis externorum criteriorum contemptus. Rite determinata  
magni

---

(1) Opusc. chemica Vol. II. p. 2. — 10.

magni potius sunt facienda (1). Illis ad-  
fuetus oculus non raro sine molesta explo-  
ratione instruitur, saltem eo usque, ut  
paucis tantum selectis experimentis cer-  
titude adquiri possit. Interdum quoque  
usus e proprietatibus pendet externis sen-  
sibus mox obviis, ut e duritie, colore,  
pelluciditate, ceteris. Hae ideo illis ju-  
re meritoque adjungendae sunt, quae  
principia indicant constitutiva.

§. 12.

*Itaque e compositione, et interna in-  
dole classes, genera et species determi-  
nentur, varietates autem ab externa fa-  
cie.* In tali systemate utriusque metho-  
di concordant commoda.

§. 13.

---

(1) Conf. in primis D. WERNER tra-  
ctatus: de notis fossilium extrinsecis, anno  
1774. lingua germanica editus.



§. 13.

Hanc viam mirando successu primus tentavit D. CRONSTEDT, sed postea menſtruorum ope analyſis, praeſeunte illuſtri MARGRAFIO, — melius interiora reſeravit ſacraria, adeo ut jam eximii operis multi in oculos cadant naevi, qui tamen auctori minime vitio ſunt vertendi, ſed experimentorum defectui adſcribi debent. Celebris quidem POTTII tentamina fuſoria dudum innotuerant, ſed haec, quamvis utiliſſima, principia tamen corporum plerumque confundunt, rariffime denudant.

§. 14.

In digerendis foſſilibus *compoſita uberimi principii ingredientis locum generatiſim ſequi debent*. Sint *a* et *b* principia proxima quorum prius pondere praeualeat, horum connubium ſub genere prioris

ris

ris collocandum esse patet. Haec tamen regula varias patitur exceptiones.

§. 15.

Scilicet *proprietates omnium materiarum non ejusdem sunt intensitatis*, si ita loqui convenit. Nonnullae quasi ditiores vel efficaciores inveniuntur, adeo ut toti massae suum genium et characterem imprimant, quamvis infra dimidium pondere efficiant. In tali casu indoles potius est consulenda, quam copia, praesertim si *b*, parcius inhaerens, vix umquam aequilibrium attingat, multo minus praeponderet.

§. 16.

Ita comparatae sunt argilla pura et magnesia, quae non modo nunquam solitariae repertae sunt, sed etiam fere semper ea dosi aliis admixtae, ut minorem ponderis partem constituent. Si igitur regula supra allata ( §. 14. ) rigoro-

gorose valeret, inter genera facile desiderarentur hae terrae primitivae, quod sine dubio absonum foret. Interea limites aegerrime determinantur.

§. 17.

Est etiam *ratione valoris quaedam praerogativa*. Minerae, quae aurum argentumve continent, nobilibus metallis adnectuntur, *quamvis heterogenea* tres quartas et ultra efficiant. Pyrites sub cupri genere collocatur, etsi ferri longe uberius insit. Alia praetereo exempla. Hic mos, unanimi firmatus mineralogorum consensu, physico quidem fundamento caret, monticolis tamen utilis servandus videtur, idque eo majori jure, quo certius constat, plebrasque mineras alioquin sub peregrinis titulis esse quaerendas.

§. 18.

§. 18.

Tandem notasse juvat, quod *principium solidum pro basi generica haberi soleat*, quamvis interdum menstruum adeste possit uberius. Ita Magnesia vitriolata a terra nomen mutuatur, etsi acidum vitriolicum illam pondere excedat. Idem valet de gypso, alumine, aliis.

## CLASSES FOSSILIIUM.

### §. 19.

**F**ossilia generatim quadruplicis sunt differentiae, vel enim salina, vel terrena, vel phlogistica, vel denique metallica indole gaudere reperiuntur. Hinc *quatuor enascuntur classes.*

### §. 20.

**SALES** audiunt, qui in lingua plus minus saporis excitant, et probe pulverati aqua ebulliente, saltem millies ponderosiore, solvi possunt. Igne liquefcunt et plerique mutantur vel destruantur.

### §. 21.

**TERRAE** saporis et solubilitatis gradu nuper memorato carent (§. 20.), quamvis nonnullae, et forte pleraeque, in olla Papini aqua suscipi queant, praesertim antecedente solutione in alio  
ment-

menstruo et praecipitatione idonea, qua superficiem satis ampliatae. Cum salibus continua progressionē conjunguntur in catena naturae, vix nisi artificiali limite, antea posito, discernendae.

Leni ignitione forma non mutatur, nec vehementi corpus dissipatur. Quintuplam aquae gravitatem specificam non attingunt.

§. 22.

BITUMINA mihi audiunt fossilia, phlogisto onusta, quae aquam respuunt, sed pura oleis suscipiuntur: igni exposita fumant, plerumque inflammantur, qua magnam partem consumuntur et nonnumquam tota evanescent.

§. 23.

METALLA completa aquam omnino respuunt, nec oleis suscipiuntur nisi pauca, eaque phlogisto pauperata. Inter nota corpora ponderosissima, im-



---

mo aquam aequalis voluminis sexies superant horum levissima.

Ignе liquescunt superficie nitida et in vasis argillaceis convexa.

---

## CLASSIS PRIMA.

## SALES.

## §. 24.

**S**Alium natura et indole ignorata admodum manca erit aliorum corporum cognitio, hisce igitur incipiendum existimo. *Sales* autem *nativi* sunt vel *acidi*, vel *alkalini*, vel *neutrales*, vel *medii terrestres*, vel denique *metallici*.

## §. 25.

ACIDA proprio distinguuntur sapore, alkalia aerata cum effervescencia solvunt et succos vegetabilium coeruleos, saltem *Heliotropii* tincturam, rufant. Horum nostris diebus plura sunt cognita, sed pleraque in terrae gremio fere numquam solitaria reperiuntur, idque ob rei naturam, nam adeo valida menstrua



non possunt non cito materiis occurrere saturantibus. Interea eorundem in oeconomia naturae multifarium, et sine conditione necessarium usum, et copia et indolis diversitas evincit.

§. 26.

Quum Mineralogia corpora ordinet talia, qualia porrigit crusta telluris, et acida non nisi maritata occurrant, illis meris proprius locus denegari posset, sed eodem jure terrae primitivae essent excludendae, quarum saltem nonnullae solitariae nondum sunt inventae. Itaque in systemate, compositioni innixo, haud spernendam adfert lucem brevis etiam eorum principiorum descriptio, quae nunquam vel rarissime sponte segregata in conspectum veniunt.

§. 27.

ACIDUM *vitrioli* arte concentratissimum gravitate specifica gaudet 2,

125. Purum odore et colore caret. Rarissime in formam solidam frigore concrefcit, fed aere nitrofo coagulari potest, e connubiis optime dignoscendum, uti alia acida.

In viciniis Senarum et Viterbii aqua dilutum inter collium lapides nonnumquam effluere narrat D. VANDELLI (1), igne subterraneo sine dubio excuffum, fed alias fere femper nuptum alkali (§§. 44. 47. 50.) terrae (§§. 58. 59. 63. 67.) metallo (§. 69. 70. 72. 73.) vel phlogisto (§. 134. 136.)

ACIDUM *vitrioli phlogificatum* non raro eructant Vulcanorum voragines, odore instructum penetrantissimo, suffocante. Phlogiston inquinans et caloris ligata materia aeream impertiunt formam, quae tamen aquae connubium non impediunt.

B 4

§. 28.

(1) De Thermis Patavinis.

## §. 28.

**ACIDUM nitrosum** e regno fossilium extrudunt nonnulli, quum e corporibus organicis putrescendo ortum credant. At ipsa haec corpora emortua complexum fossilium tandem intrant, e quibus fixas compagis particulas plerasque antea mutuo acceperant.

Hoc acidum **concentratissimum** arte elicitum gr. specif. 1. 580. praeditum est. Purum colore caret, sed ob ingentem phlogisti attractionem non nisi peculiari encheiresi tale adquiri potest. Cum varia inflammabilis dosi acidum phlogisticatum vel aerem nitrosum gignit. Quod sciam, namquam sponte liberum invenitur, nisi forsan in aquis meteoricis, sed ligatum: vel alkali (§§. 45. 47. 51. ) vel terra (§§. 60. 64. )

## §. 29.

**ACIDUM muriaticum** in cortice telluris

telluris uberrime hospitatur. Acerrimum arte paratum gravitatem specificam 1. 150 vix attingit, admodum volatile et peculiari dotatum odore. Superflua spoliatum aqua aeream induit formam, nam phlogiston instar principii compagem intrat (1).

Liberum non invenitur, nisi cum nitroso forsan in aquis meteoricis (2) Ligatum prostat alkali (§§. 46. 49. 52.), terra (§§. 61. 65.) vel metallo (§§. 74. 161. 175. 191.)

§. 30.

ACIDUM *fluvris mineralis* arte laxatum gravitatem specificam 1. 500. nunquam superavit, valde volatile. Vapores calidi vitrum corrodunt et humido

(1) N. Acta Ups. vol. II. pag. 202.

(2) D. Margraf.

do occurrentes terram siliceam generant vel saltim deponunt. Superflua separata aqua hoc lacidum acream adsciscit formam (1).

Sponte liberum haftenus invenit nemo, sed calci nuptum adest in fluore minerali (§. 96.) et, ni fallor, omne quoque siliceum intrat (§. 123.)

§. 31.

**ACIDUM arsenici** ficcum arte paratur, gravitate specifica 3. 391. gaudens, igne fusibile et fixum, donec materiae caloris tantum abstulerit phlogisti, ut formam adquirat arsenici albi. In aere humido deliquescit.

Liberum sponte non occurrit, sed ligatum invenitur calce cobalti (§. 228.), et praesertim phlogisto in arseni-

---

(1) Opusc. Vol. II. pag. 40.

fenico metallo fragili (§. 220.) ejusdemque calce (§. 222.)

§. 32.

ACIDUM *molybdaenam* ingrediens verisimillime metallicae putatur originis, quamvis nondum pateat cujus. Quum arsenicum, metallum fragile, dephlogisticando tandem abeat in acidum ab omnibus aliis distinctum, in aliis quoque metallis peculiaria acida radicalia delitescere, non sine ratione conjectari licet, quamvis ob phlogisti validiorem cohaesionem nondum denudata. Quomodo per artem extricetur, huc non pertinet (1). Quod autem acidum e molybdaena haecenus elicited metallica gaudet indole et adhuc phlogisto imperfecte sit liberatum, sequentia momenta evin-

(1) D. SCHEELE Act. Stockh. 1778.

evincere videntur, nimirum 1) fapor acidus simulque metallicus; 2) salis microcosmici et boracis cum illo tinctus, nam hi sales vix nisi metallica calce colores adquirunt; 3) decompositio ope alcali phlogificati, quae semper metallici indicat praesentiam; 4) forma concreta non deliquescens, arsenico albo analoga; 5.) *gravitas specifica* 3, 460. Immo nuperrime, rationibus a me allatis motus Cl. HIELM reductionem tentavit regulumque obtinuit, uti videtur ab aliis notis diversum, sed nondum factis examinatum.

§. 33.

*ACIDUM calci ponderosae* inhaerens valde est adfines praecedenti, quod tamen aquae calcis instillatum a calce ponderosa diversum generat connubium, licet in variis aliis momentis convenient haec acida. Nō fallor hoc etiam metallica gaudet indole.

§. 34.

## §. 34.

ACIDUM *phosphori* in regno animali obvium, in vegetabili longe uberior occurrit, sed in fossili rarissimum primus detexit Dom. I. G. GAHN, plumbo adunatum (1). In pluribus forte fossiliis adest hoc acidum, quod aqua spoliatum gravitate specifica gaudet 2, 687. igne fusibile.

## §. 35.

ACIDUM *boracis*, vulgo salis fedativi nomine insignitum, productum esse multi, etiamnum existimant, sed in lacu prope Senas in magno Hettruriae ducatu liberum haud ita pridem invenit D. HOEFER (2), et in borace nativo ligatum alkali minerali longe antea

---

(1) Opusc. chem. vol. II. pag. 424.

(2) De sale fedativo naturali 1778.



tea cognitum fuit (§. 53.) Instar acidi agit, sed admodum debilis. Igne funditur. Aqua volatifikasi potest, gravitate instructum specifica 1, 480.

§. 36.

ACIDUM *succini* vocari potest sal concretus ab electo elicitus, nam instar acidi debilis se gerit. Num regno vegetabili ortum debeat succinum, adhuc disceptatur, interea fossiliis adnumerant haud pauci (§. 140.)

§. 37.

ACIDUM *aereum* non tantum aquis, sed etiam pluribus fossiliis ligatum inhaeret, uti alkalibus (§§. 54. — 56.) terris (§§. 71. 183. 192. 217. 234. 243). In atmosphaera hoc acidum liberum adest, gravitatis specificae 0.0018.

§. 31.

ALKALIA sapore lixivioso proprio,

prio, acidorum vehementi attractione et caeruleos vegetabilium succos virefcendi facultate dignoscuntur. De illis solitariis alioquin idem fere valet, quod de acidis antea notavi, eorum nempe tantam esse attractionis virtutem ut diu vidua esse nequeant. Ambiens atmosphaera acidum saltem aereum exhibet, si aliud potentius desideratur. Hinc semper nupta occurrunt, nisi arte praeparata.

§. 39.

Nova acida quotidie deteguntur, sed diverforum alkalium per multos annos cognitus numerus ternarius incremento caruit.

§. 40.

ALKALI *fixum vegetabile*, omni orbatum acido, telluris crusta non promit, interdum vero ligatum fovet vel vitriolico (§. 44.), vel muriatico. (§. 46.),

46.), saepissime nitroso (§. 45.), rarissime aereo (§. 54.).

§. 41.

\* Neque ALKALI *fixum minerale* viduum prostat, sed semper maritatum acido, rarius vitriolico (§. 47.) vel nitroso (§. 48.), plerumque muriatico (§. 49.) vel aereo (§. 55.).

§. 42.

ALKALI *volatile* argillis saepe inhaeret, sine dubio aeratum (§. 56.), nam causticum artis auxilium postulat. Praeterea et acido vitriolico (§. 50.) et muriatico unitum reperitur (§. 52.).

§. 43.

Acida alkalibus nupta SALES NEUTRALES generant, qui aqua soluti nequaquam turbantur alkali addito et vaporando plerumque in crystallos concresecunt. Si reagentibus utrumque delitescit principium proximum hi *perfecti* vocantur,

cantur, *imperfecti* autem qui unius vel pariori doſi vel propria debilitate, alterius ſpecificas facultates plus minus adhuc produnt. Nativi utriusque variationis jam ſequuntur.

SALES NEUTRALES.

§. 44.

**A**LKALI *vegetabile vitriolatum* (Tartarus vitriolatus vulgo) raro sponte occurrit, nisi in tractibus sylvarum combustarum.

§. 45.

**ALKALI** *vegetabile nitratum* (Nitrum prismaticum) in superficie telluris oritur, ubi vegetabilia, praesertim partibus animalibus mixta, putrescendo destruuntur. Basis alkalina herbis antea inest (1), sed acidi genesis haecenus minus est manifesta, utrum nempe in vegetabilium acidis delitescens putrescendo quantum satis dephlogisticetur et denude-

---

(1) D. D. MARGRAF, WIEGLEB.

nudetur, an vero aer purus, in atmosphaera obvius, revera acidum nitri contineat, phlogisto perfectissime satiatum (1), quod alkali, sub putrefactione liberato, attractum extricatur et inflammabili remoto consuetam tandem recuperat formam. Utramque forte viam adhibet natura, posterior tamen notabili experimento luculenter confirmari videtur (§. 60.)

Nitrum, quotannis copiose genitum, non potest, non interdum reperiri in puteis et fontibus, quod etiam Berolini (2), Londini (3) et alibi observatum est. Non numquam ea adest copia, ut caro in illa cocta egregie rufeat.

C 2

§. 46.

(1) Opusc. chem. Vol. II. pag. 368.

(2) MARGRAF Opusc.

(3) CAVENDISH. Phil. Tr. 1767.

## §. 46.

ALKALI *vegetabile salitum* (Sal digestivus Sylvii) aliquando occurrit, sed raro, forte e destructis vegetabilibus et animalibus plerumque ortum.

## §. 47.

ALKALI *minerale vitriolatum* (Sal mirabilis Glauberi) in aquis interdum adest. In Siberia et regno Astracano nonnulli lacus illud vehunt, pluresque alibi fontes.

## §. 48.

ALKALI MINERALE *nitratum* (Nitrum quadrangulare) raro occurrit, nisi ubi plantae marinae putrescunt.

## §. 49.

ALKALI MINERALE *salitum* (Sal culinaris, communis, muria) uberri-  
mum reperitur tam in terra efficiens  
strata plus minus crassa (Sal gemmae),  
quam in fontibus (Sal fontanus) et la-  
cubus,

cus, nec non in magno oceano (Sal marinus) solutus.

§. 50.

ALKALI VOLATILE *vitriolatum* (Sal secretus Glauberi) vix alibi generatur, quam ubi sulphurea comburendo fumus acidi vitriolici phlogificati spargitur, qui in locis putridinosis alkali volatili absorbetur. Ita Fahlunae ex ustulatione minerarum ortus vapor acidus in latrinis salem memoratum provocat. Talis quoque aliquando in Vulcanorum voraginibus germinat:

§. 51.

ALKALI VOLATILE *nitratum* (Nitrum flammans) cum nitro vulgari plerumque reperitur.

§. 52.

ALKALI VOLATILE *salitum* (Sal ammoniacus) tam e Solfatara Neapolitana, quam e Vesuvio apportatum examinavi.

C 3

Sales



Sales neutrales hæcenus memorati sunt perfecti, qui autem sequuntur imperfecti (§§. 53. — 56. )

§. 53.

ALKALI MINERALE qua partem tantum peculiari acido satiatum, vulgo Tinkal vocatur, et post depurationem Borax. In regno Tibet effoditur (1). Acidi sui æquale circiter pondus recipit vulgaris Borax, antequam alkalinae penitus evanescant proprietates.

Acidum boracis alkali vegetabili vel volatili sponte adunatum adhuc nemo, quod sciam, invenit.

§. 54.

ALKALI VEGETABILE *aeratum* vix occurrit nativum nisi aliquando in vicinia sylvarum igne destructarum.

Anno

---

(1) Acta Stockh. 1772.

Anno 1744. Dnaci in Flandria fons muro circumdatus detegebatur, qui in aquae libra, praeter alias materias, 12. grana alkali vegetabilis praebuit (1).

§. 55.

ALKALI MINERALE *aeratum*, veterum nitrum, natron, in pluribus praesertim Asiae et Africae locis copiose reperitur vel in strata crystallina concretum, vel instar pulveris collapsum, vel e vetustis muris lateritiis efflorescens, vel denique in fontibus solutum uti videtur, e muria decomposita saepe ortum. Novi quidem acidum salis suae basi pertinaciter adhaerere, igne solo expellendum, sed atmosphaerae vicissitudines, continue progredientes per saecula, forte validiores sunt.

C 4      Saltim,

(1) Baumé Mem. des Sçs. Etr. tom. IV.

Saltim, ubi ingentes campi hoc alkali operiuntur, in superficie muriae vix quidquam immixtum invenitur, quo autem profundius, eo etiam uberius adest hoc inquinamentum, nondum decompositum ob impeditum aeris accessum.

§. 56.

**ALKALI VOLATILE** *aeratum* in puteo quodam Londinensi (1), item in Lauchestadiensi (2) et Frankfurtenfi ad Moenum (3) adesse et cuprum aquae immersum caeruleo colore solvere perhibetur.

Tria jam memorata alkalia plene aerata, a causticis multum differunt sapore mitigato, in crystallos concrescendi

---

(1) Phil. Trans. 1767.

(2) HENCKEL Bethesda port.

(3) BOMARE Dictionnaire.

di facultate, nec non effervescentia cum acidis, quae aereum expellere possunt, sed succi vegetabilium coerulei illis itidem virescunt, debilius tamen quam causticis. Itaque, etsi subtile acidum aereum in aliis momentis neutralem adferat indolem, haec tamen respectu reactionum est quodammodo manca et imperfecta.

SALES MEDII TERRESTRES.

§. 57.

**T**errarum cum acidis connubia, quae salibus adsignatam possident solubilitatem (§. 20.), alkalibus aeratis turbantur et praecipitantur, non autem alkali phlogistico.

§. 58.

TERRA PONDEROSA *vitriolata* inter terras locum habet (§. 90.); *nitrata* forte alicubi nativa occurrit, a nemine tamen adhuc inventa, quod etiam valet de *aerata*. *Salitam* autem aquis lacus Vettern, aliisque in vicinia vehi, mihi narravit Cl. HIELM (1).

§. 59.

(1) Conf. Prael. SCHEFFERI §. 188. not. 2.

§. 59.

CALX *vitriolata* (Gypsum, Selenites) non tantum variis aquis soluta reperitur, sed etiam in pluribus locis ingentia efficit strata. Terris adnumerant omnes Mineralogi, sed, ut mihi videtur, sine ratione. Gypsumustum cum aqua revera incalescit, minus tamen, quam calx usta.

§. 60.

CALX *nitrata* non numquam inhaeret aquis, sed plerumque admodum parce. Colles cretacei alicubi in Gallia acido nitroso sponte sensimque imbui narrantur, adeo ut massa semel lota, justo elapso tempore, iterum eiixari queat.

§. 61.

CALX *salita* (Sal ammoniacus fixus) in aquis crebro occurrit.

§. 62.

§. 62.

CALX *aerata* excessu acidı aerei soluta vulgatissima est in aquis, quae hac paullo uberius onustae vocantur crudae, decoctione vel evaporatione crustas stiriasve deponentes calcareae indolis.

Calx aerata sine excessu subtilis acidı aquis non suscipitur, ideoque ad terras jure ablegatur (§. 21.)

§. 63.

MAGNESIA *vitriolata* (Sal anglicus, Epfomensis, Seidlizensis, Seydschutfensis, amarus &c.) in aquis Angliae, Bohemiae, aliarumque regionum non raro hospitatur. Hic sal aquae calcis immerfus mox deponitur, quo ab alkali minerali vitriolato facillime distinguitur.

§. 64.

MAGNESIA *nitrata* cum nitro reperiri solet.

§. 65.

§. 65.

MAGNESIA *salita* variis aquis vehitur, et copiose praesertim adest in oceano, quem ingrata inquinat amaritiae.

§. 66.

MAGNESIA *aerata* excessu acidii aerei aquis suscipitur frigidis, sed sine illo parcissime vel potius nihil, tum terris adnumeranda (§. 21.)

§. 67.

ARGILLA *vitriolata* (Alumen) interdum sponte generatur fatiscencia pyritae, in argilla vel schisto argillaceo hospitantis.

In fonte Steckenitzeni Bohemiae (1), in Ostrobothnia et alibi non numquam occurrit. Quod alumen plumosum

---

(1) Margraf. Kl. Schrift. tom. II. p. 191.



mosum vulgo audit, non est salinum.  
**ARGILLA** *nitrata*, *salita* vel *aerata*,  
 quod sciam, a nemine aquis hactenus  
 inventa est.

SALES

## SALES MEDII METALLICI.

## §. 68.

**S**ALES nativi huc pertinentes alkali phlogificato dignosci possunt, quippe quo omnes praecipitantur. Paucos, qui notas habent salinas (§. 20.), enumerabimus, reliquos ad mineralisationes relegantes.

## §. 69.

**CUPRUM** *vitriolatum* (Vitriolum cupri, coeruleum) in fodinis Herregrundensibus, Fahlunensibus, aliisque, quae pyriten cuprifera porrigunt, reperitur.

## §. 70.

**FERRUM** *vitriolatum* (vitriolum ferri, viride) e fatifcente pyrite vulgari ortum.

## §. 71.

§. 71.

FERRUM *aeratum*, acidi aerei excessu solutum, aquis martialibus subtilioribus inest.

FERRUM *nitratum* vel *salitum* nondum reperire licuit nativum.

§. 72.

NICCOLUM *vitriolatum* interdum occurrit, e mineris sulphuratis fatiscen-  
tibus genitum.

§. 73.

ZINCUM *vitriolatum* ( vitriolum zinci, album ) e pseudogalaenis fatiscendo provocatum interdum invenitur, sed raro, quum hae minerae spontaneam aegre subeant decompositionem.

§. 74.

MAGNESIUM *salitum* aquis quibusdam inhaeret, teste D. HIELM. Num aeratis aliquando vehatur, uti ferrum, haecenus ignoramus.

SALES

## SALES TRIPLICES.

§. 75.

**S**ales compositi hæcenus memorati duplices sunt, hoc est, duobus tantum principiis proximis compositi, sed non numquam tria, vel etiam plura ita ununtur, ut crystallizando separari nequeant. Vitriola saltim nota rarissime pura occurrunt, sed duo vel interdum tria conjuncta.

Accidit quoque, ut sales neutrales terrestribus et terrestres metallicis adunentur. Generatim sales compositos distinguo secundum numerum principiorum, sive idem acidum cum variis basibus, sive eadem basis cum diversis acidis copuletur, sive denique et plura menstrua, et plures adsint bases. Hinc oriuntur sales triplices, quadruplices,

D

cete-

ceteri, quos in lucem extrahet longioris aevi diligentia. En falis triplicis et quadruplicis nativi exempla praecipua mihi jam nota.

§. 76.

ALKALI MINERALE SALITUM  
*magnesia salita* inquinatum.

Alkali minerale salitum non deliquescit purum, sed tale rarissime occurrit, et ne quidem fossile (Sal gemmae) hoc defectu semper caret.

§. 77.

MAGNESIA *vitriolata* *vitriolo martis* inquinata (1).

§. 78.

ALUMEN NATIVUM *vitriolo martis* inquinatum. In Schisto aluminari non numquam plumarum instar efflorescit:

---

(1) D. MONNET. de aquis mineralibus.

rescit: num veterum alumen plumosum?

§. 79.

ALUMEN NATIVUM *vitriolo Cobalti* inquinatum. Hoc in fodinis Hergrundenfibus et Idrienfibus obvium, longa graciliaque filamenta plerumque referens, Graecorum forte Trichites. Hic fal aqua defillata folutus, acidum vitrioli mox prodit terra ponderofa falita. Alkali phlogifticato fedimentum cobaltino fimile decedit, quod etiam cum borace vel fale microcofmico coeruleum exhibet vitrum.

§. 80.

VITRIOLUM CUPRI *martiali* contaminatum.

§. 81.

VITRIOLUM FERRI *niccolino* contaminatum.

§. 82.

VITRIOLUM CUPRI et *martiali*  
et *zincino* inquinatum. Tale est Fahl-  
nense.

CLAS-

## CLASSIS SECUNDA.

## TERRAE.

## §. 83.

UT rite cognoscantur Terrae, earumdem compositio est indaganda. *Primitivae* audiunt, quae in simplices resolvi nequeunt, quae autem harum duas pluresve intime unitas fovent, *derivativae* vocantur. Mechanica miscela heic non proprie intelligitur: saltem non talis, quae oculis observari potest, Saxi competens.

## §. 84.

Per se patet primitivas totidem efficere genera naturalia, quorum species e diversis immixtis heterogeneis sunt determinandae.

Qui e qualibet terra primitiva plu-

D 3 ra



ra constituit genera, argenti mineras vitreas, rubras, albas, corneas, ceterasque compositione differentes, sub totidem generibus dilacerare debet, nisi sibi contrarius.

§. 85.

Haecenus non nisi quinque primitivae innotuerunt. Qui pauciores numerant, metamorphosis tantum innituntur opinabilibus, non autem fidis experimentis (1). Posito numero quinario, qui tentaminibus huc usque institutis congruit, species ex illarum sola mixtione octae, non nisi quatuordecim possibiles sunt, decem nimirum duplices (duas terras continentes), sex triplices, tres quadruplices et unica, quae singulas primitivas simul comprehendit, uti

(1) Opus. chem. vol. I. pag. 394. -- 399.

uti e doctrina combinationum patet. Quamvis autem hae possibiles sint diversae miscelae et forte omnes revera existant, nondum tamen totidem indagare licuit. Ceterum acidorum cum terris connubia nativa, quae aqua fervida millies ponderosiore non suscipiuntur, et terrae salinae appellari possunt, specierum jure augment numerum, quippe quae chemica certo gaudent compage.

§. 86.

Terrae primitivae haecenus detectae sunt **TERRA PONDEROSA**, **CALX**, **MAGNESIA**, **ARGILLA** et **TERRA SILICEA**, quae tales putentur oportet, donec idoneis constet experimentis, quod vel in simpliciores resolvi, vel inter se invicem arte transmutari queant.

Hae primò considerandae sunt in maxima sua simplicitate et puritate,

D 4                      quam-

quamvis tales numquam porrigat natura et ne quidem arte omni heterogeneo liberari possint. Aqua et acidum aereum primas quatuor lubentissime inquinat, quibus igne remotis, paullum materiae caloris adfigitur, donec potentiore attractione expellatur restans. Interea jam simplicitatem possident, qua majorem, alia haecenus nota methodo, adquirere nequeunt. Itaque quantum satis uitas probe cognoscere e re est, ut ab adfixis peregrinis pendentes facultates dein melius discernantur.

TER-

## TERRA PONDEROSA.

## §. 87.

UT haec, quantum fieri potest, pura obtineatur, Spathum, quod vulgo ponderosum audit (§. 89.), in subtilem comminuatur pulverem, qui cum alkali fixo et pulvere carbonum in proportionem anatica commixtus in crucibulo clauso per horulam igniatur. Massae pulveratae adfundatur acidum nitrosum vel muriaticum dilutum, donec omnis cessat effervescencia et liquor acidus manet, qui dein addito alkali fixo aërat, demittit terram ponderosam aëratam. Si vel acidis vel sali alkalino quidquam inest acidi vitriolici, mox spathum regeneratur ponderosum. Quod in hac operatione remanet acido intantum est spathum nondum decompositum,

fitum, operationis repetitione divellendum, sed quae tum obtinetur terra martiali et interdum argillaceo vasis contaminata reperitur, praestat igitur qua puritatem primae operationis foveboles.

§. 88.

**TERRA PONDEROSA** *aerata* gravitate specifica gaudet 3. 773. in centenario continens aquae circiter 28. acidi aerei 7. et terrae purae 65. Acida cum effervescencia illam adgrediuntur: vitriolicum generat spathum ponderosum, nitrosum et muriaticum connubia praebent, quae in crystallos aegre solubiles facile rediguntur, sed haec terra acetata deliquescit.

Ignem vix fluit, si omni caret inquinamento acido vel alkalino, sed ponderis  $\frac{35}{100}$  amittit. Mediante ma-

teria

teria caloris adfixa 900. partes aquae unam solvunt, quae dein sub forma cremoris, in acidis effervescentis, fercernitur, si aeri atmosphaerico aditus patet. Ustam acida sine effervescencia, sed cum aestu suscipiunt, tardius tamen, quam aeratam (1). Usta quoque e Sale ammoniaco alkali volatile expellit causticum et cum sulphure hepar conficit, cujus tamen solutio aquosa acido nitroso vel muriatico non nisi imperfecte decomponitur ob insignem attractionem terram inter et acidum in sulphure; cujus ope etiam alkali vegetabili hoc acidum eripitur (2).

Hisce proprietatibus cum illis comparatis, quae mox de calce memorabuntur

(1) Opus. Vol. I. pag. 21. 398.

(2) N. Acta Upf. vol. II. pag. 198.

buntur (§§. 92. 93.), tam convenientia, quam discrepantia facile elucet.

§. 89.

TERRA PONDEROSA *vitriolata*  
(*Spathum ponderosum* vulgo) gravitate specifica aequale aquae destillatae volumen quater et ultra superat.

Acido vitrioli concentrato tota solvitur ebulliando, copiosum tamen requiritur menstruum et unica aquae gutta soluti portiunculam praecipitat. Idem gypso accidit, sed et longe pariori acido opus est, et tardius feceritur deturbandum. Si spatho ponderoso sulphur inesset certe solutione totali in conspectum veniret, sed ejus nulla invenire potui vestigia.

CRONSTEDT Min. edit. Suec. §.

18. 2. *Marmor metallicum*; §.

19. 2.

§. 90.

## §. 90.

TERRA PONDEROSA vitriolata  
et petrolco imbuta, gypso, alumine et  
siliceo inquinata.

CRONSTEDT Min. §. 24. *Lapis*  
*hepaticus*.

Nucleus, e minera aluminis ad  
Andrarum in Scania, huc pertinens per  
analysin e centenario dedit 33. silicei, 29.  
terrae ponderosae causticae, argillae fe-  
re 5. et calcis causticae 3., 7. prae-  
ter aquam et acidum vitrioli. Si cal-  
culo eruitur quantum pondus bases,  
quae acidum vitriolicum recipere pos-  
sunt, satiatae efficere debent, 71. cir-  
citer librae inveniuntur, quae 33. au-  
ctae centenarium aliquot libris exce-  
dunt. Hoc incrementum differentiam  
innuit massae nuper crystallifatae et pro-  
be exsiccatae.

## §. 91.



## §. 91.

Quum terra ponderosa ante annum 1774. penitus fuerit incognita et multi Mineralogi eandem adhuc ignorent, mirum nemini videri debet, quod nondum plures hujus generis species innotuerint, Vix dubito, quin saltim *Terra ponderosa aerata*, etiam aliis terris admixta invenietur, pluribus specimenibus Chemiae ope rite examinatis, quam hucusque fieri potuit.

---

  
 CALX.

C A L X.

§. 92.

**Q**Uoniam Calx aerata in terrae gremio sponte occurrit, peculiari vix opus est operatione, qua adquiratur pura. Creta selecta in subtilem redacta pulverem et in aqua destillata pluries cocta, calcem vel magnesiā salitam, quibus non raro inquinatur, mittit, postea non nisi mechanice inhaerentia peregrina continens, quae plerumque admodum parca sunt. Si autem haec etiam segregata cupimus, aceto destillato solvatur creta lota, alkali volatili aerato praecipitetur, sufficienter lavetur et exsiccetur.

§. 93.

Calx modo jam descripto depurata gravitate specifica gaudet 2, 720,  
in

in centenario fovens circiter 34. acidi aerei, 11. aquae et 55. calcarei puri. Acida cum effervescencia suscipiunt, et centenarius 12. tantum graduum aestum provocat: vitriolicum generat gypsum aegre solubile (§. 59.), nitrosum et muriaticum sales deliquescentes (§§. 60., 61.), sed aceto provocatur Crystallifabile persistens.

Ignem non cogitur calx pura, at ponderis  $\frac{45}{100}$  amittit, dein cum aqua exaestuans et ejusdem 700. partibus solubilis (1). Acida centenarium solvendo provocant calorem 140. graduum, at sine effervescencia, quod optime observari potest, si calx iusta primum

---

(1) Opusc. chem. Vol. I., pag. 23.

num aquae immergitur, adeo ut portio caloris dissipetur, qua alias menstruum ebulliret, itemque aer atmosphaericus massam spongiosam frigidatam permeans expellatur. Huic sub aqua demersae acidum nitrosum vel muriaticum adfundatur, et rite uita nulla orietur effervescencia. Solutio tarde procedit (1), sed saturatione iidem adquiruntur sales, ac cum aerata. Uita e sale ammoniaco alkali volatile expellit causticum et sulphur solvit, quod tamen quovis acido, etiam aereo, facile dejicitur.

§. 94.

Inter species hujus generis nativas primum memoranda est CALX *aerata*,

(1) Opusc. chem. Vol. I., pag. 398.

*rata*, quae ingentia efficit strata. Eiusdem proprietates praecipuae sunt enumeratae (§. 92.). Rarissime omne desideratur martiale, quo etiam contaminatum reperitur clarissimum spathum Islandicum, et de omnibus fere fossilis idem valet, quam ob rem in sequentibus non nisi notabilia inquinamenta martialia in censum veniunt.

CRONSTEDT Min. §§. 5.—12.

§. 95.

CALX *aerata*, petroleo simul plus minus imbuta. In acidis effervesceat et solvitur, vitriolicum autem ea saepe fuscescit. Calefactione et frictione foetet. Oleosum adeo plerumque est parcum, ut destillatione vasa tantum intus pinguescant, raro guttulae colligantur, nisi e magna massa. Igne aperto color e petroleo exsiccat facile de-

destruitur. Plerumque argillae martialis portio inest.

CRONSTEDT Min. §§. 22. 23.

*Lapis, fuillus* vulgo:

§. 96.

CALX *fluorata*. Pura acidis nitri et muriae tota solvi potest. Incalescentiae exposita, quae ignirione est debilior, phosphorescit. Acidum fluoris aquae calcis instillatum pulverem praecipitat qua proprietates calci fluoratae omnino convenientem. Naturalis saepe contaminatur argillae, filicis et acidi muriatici portiuncula, sed non semper.

CRONSTEDT Min. §§. 97.—101.

*Fluor mineralis*.

§. 97.

CALX *acido peculiari*, forte metallico, satiata (§. 33.). In Acidis, praesertim muriatico, sub digestionis

E 2                      calo-

calore egregie flavet, sed parum sol-  
vitur.

CRONSTEDT Min. §. 209, i. *Lap-  
pis ponderosus.*

§. 98.

CALX *aerata magnesia salitae*  
*portiuncula inquinata.*

§. 99.

CALX *aerata argillaceo in-  
quinata.*

§. 100.

CALX *aerata filiceo inquinata.*

§. 101.

CALX *aerata tam argillaceo, quam  
filiceo inquinata.*

CRONSTEDT Min. §. 25. *Marga  
calcareo.*

§. 102.

CALX *aerata ferro et magnesia in-  
quinata.*

CRONSTEDT Min. §. 30.

§. 103.

## §. 103.

Quin primae quatuor (§§. 94—97), nec non ultima (§. 102.), gentianae distinctaeque sint species, nullum est dubium, reliquae autem difficultatem pariunt, forte e sola pendentes mechanica mixtura. Si heterogenea oculis discerni possunt, tum mox ad Saxa ablegandam materiam existimo, heic autem omnem oculorum aciem effugiunt. Praeterea terrae se invicem attrahendi virtute gaudent et talia nonnulla connubia, mechanicis intimiora, novimus. Terra ex alumine mediante alkali caustico dejecta et aquae calcis immissa mox spongiosam et pelucidam compagem amittit, albescit et condensatur, calcem ex aqua hauriens, quod connubium dein non nisi mediis chemicis disjungi potest. Hisce motus rationibus species ambi-

E 3

guas



guas excludere non audeo. Interea  
*inquinatas* voco materias, quarum  
connubia miscelis mechanicis analo-  
ga videntur, *unitas* vero, quae at-  
tractionis vinculo fortius cohaerent;

MA-

## MAGNESIA.

## §. 104.

**M**agnesia, quae in Pharmacopoliis alba vocatur, e sale anglico, illam vitriolatam continente, dejici solet. Si sedimentum terrestre puritate eximium desideratur, sal anglicus eligatur crystallinus et probe depuratus, qui aqua destillata solutus alkali volatili aëratō deturbetur, liquor tamen residuus per aliquot momenta ebulliat; ut etiam portio acido aëreo suspensa decidat.

## §. 105.

Hoc modo adquisita magnesia gravitatem specificam 2, 155. possidet, continens in centenariio acidi aërei circiter 25. aquae 30. et terreni

45. (1). Acidis solvitur sine aestu, sed cum vehementi effervescencia: cum vitriolico salem amarum anglicum regenerat; cum nitroso in crystallos cogi potest, at deliquescentes: cum mariatico et aceto non crystallifatur, massaque salina exsiccata humidum aereum avidissime attrahit.

Módico igne non liquefcit, sed ponderis  $\frac{55}{100}$  amittit, postea aquam non subiens, tarde etiam acidis suscipitur, idque sine effervescencia, sed cum aliqua incalescentia. Usta e sale ammoniaco alkali volatile expellit causticum et sulphur adgreditur, quamvis dein eidem debilissime adhaereat.

MAGNESIA *aerata* nondum nativa  
et

(1) Opusc. chem. Vol. I, Pag. 29., 373.

et vidua est inventa, nisi in aquis, excessu acidi aerei soluta (§. 66.).

§. 106.

MAGNESIA *aerata filiceo adunata*. Haec in Acidis effervesce et non raro ad chalybem scintillat.

§. 107.

MAGNESIA *filiceo intime adunata*. In acidis lente et sine effervescencia suscipitur pars solubilis.

CRONSTEDT Min. §. 79.—83.,

et forte §. 102.—105. huc etiam pertinet, sed Asbesti analy-

sin nondum ad liquidum per-

duxi.

§. 108.

MAGNESIA *argillaceo, filiceo et pyritaceo adunata*.

Hanc sequentemque speciem D. MONNET detexit.

§. 109.

## §. 109.

MAGNESIA *argillaceo, siliceo et pyritaceo* adunata, simulque *petroleo* inquinata.

Hæc species schistum aluminarem, mentitur, sed explorata magis magnesiæ, quam argillæ porrigit.

## §. 110.

Species singulæ, excepta prima, martiali, plus minus contaminatæ sunt. Non tamen, omnis a metallo color hæc est derivandus. Viridis sub ignitione omnino evanescere solet, remanente massa albida opaca.

## A R G I L L A .

## §. 111.

**P** Er argillam heic non vulgarem intelligo, filiceo numquam liberatam, sed puram, omni saltim alia terra spoliata. Talis ex Alumine Romano, aqua destillata soluto; colato et ope alkali volatilis aerati deturbato, haud difficulter acquiritur.

## §. 112.

Haec Argilla, gravitate specifica gaudet, 1, 305., acidis solvitur paulum effervescens: cum vitriolico Alumen, cum nitroso, muriatico et acetoso deliquescentes porrigens sales.

Simpliciter exsiccata aquam vehementer appetit, enollitur et certa dosi eam comparat, tenacitatem, ut pro lubitu fingi queat. Igne autem  
mas-

massa multum contrahitur, unde multifariae oriuntur fissurae, sed simul partium induratio, quae justo gradu fit scintillis e chalybe eliciendis sufficiens. Ustione tenacitas glutinosa perit et aqua excluditur ob coarctata molecularum interstitia, nec pristinus redit status, nisi solutione et praecipitatione. Solutio fieri potest tam via sicca ope salis alkalini fixi, quam humida mediantibus acidis. Menstruo vitriolico heic nulla alia competit praerogativa, quam e faciliori pendens concentratione. Argilla nec sulphur solvit nec salem ammoniacum de-  
componit.

§. 113.

ARGILLA *siliceo* tantum adunata.  
CRONSTEDT Min. §. 78. *Argilla porcellanea*.

Nuliam examinavi argillam, quae  
non

non magnam fovit silicei quantitatem,  
plerumque ultra dimidium.

§. 114.

ARGILLA *siliceo et martiali* adu-  
nata.

CRONSTEDT Min. §. 87. et 90.

§. 115.

ARGILLA *siliceo et calcareo* adu-  
nata.

CRONSTEDT Min. §. 25. *Marga*  
*argillacea*.

§. 116.

ARGILLA *siliceo et magnesia* adu-  
nata.

CRONSTEDT Min. §. 85. *B. Ter-*  
*ra lemnia*.

Talco adfinis qua principia proxi-  
ma, quae tamen heic laxius cohaerent  
et proportionem quoque differunt.

§. 117.

ARGILLA forte *sulphure*, saltim  
eju-



ejusdem *acido*, nec non *alkali vegetabili* inquinata.

CRONSTEDT Min. §. 124. 2, b.

*Minera aluminis Romani*.

Acidum sulphuris re vera continet (1), forte etiam sulphuris portiunculam. Alkali inhaerens vegetabile satis innuit vulcani sobolem.

§. 118.

ARGILLA *filiceo*, *pyritaceo* et *petroleo* inquinata.

CRONSTEDT Min. §. 124. 3.

*Schistus aluminaris* (2).

§. 119.

ARGILLA *filiceo* *infra ponderis dimidium* et *pauillo calcis aeratae* intime unita.

CRON-

(1) N. Acta Upsl. Vol. III., pag. 121.

(2) Opusc. Vol. I., pag. 291., 292.

CRONSTEDT Min. §. 43 — 48.

*Gemma.*

Gemmae cum alkali minerali per tubum ferruminatorium exploratae nullam subire videntur mutationem. Sale microcosmico et borace solvuntur. Huc pertinent *Rubinus*, *Saphirus*, *Topazius* et *Smaragdus*. Turmalinus medium quasi inter gemmas et Schoerlos constituit, indole tamen ad posteriores proprius accedit. Color omnis a ferro.

§. 120.

ARGILLA *siliceo dimidium circiter ponderis vel ultra efficiendi, pauxilloque calcis aeratae intime unita.*

CRONSTEDT Min. §§. 68 — 71.

*Granatus et Basaltes ( mihi Schoerlus ).*

Extremae harum specierum varietates facile distinguuntur, vicinae autem difficulter.

§. 121.

## §. 121.

ARGILLA *siliceo*, dimidium circiter ponderis vel ultra efficiendi, pauxilloque *calcis laxæ* unita.

CRONSTEDT Min. §§. 108—112.

*Zeolithus*.

Magna est cum Schoerlis adfinitas, sed in Zeolitho principia proxima adeo laxè cohererent, ut acida eorundem nexum divellere possint, sine præcedente cum alkali fixo præparatione, quod cum Schoerlis vix locum habet.

Zeolithum magnesia inquinatum nondum examinavi.

## §. 122.

ARGILLA *siliceo* copioso, *magnæ* autem parvæ, sed intime unita.

CRONSTEDT Min. §§. 93 — 96.

• *Mica. Talcum.*

TER-

## TERRA SILICEA.

## §. 123.

**H**Aec aequae ac reliquae primitivae vix umquam perfecte pura invenitur. Ut in hoc statu cognoscatur, crystalli quartzosae clarae in pulverem redigantur, cum quadruplo alkali fixi fundantur, aqua solvantur, acido superfluo fortiori deturbentur, sollicitè laventur et exsiccentur. Acidum abundare debet, ut terrae peregrinae probe separantur.

## §. 124.

Haec terra gravitate specifica gaudet 1, 975. In aqua molecule nuper deturbatae spatium occupant duodecies saltim majus, quam exsiccatae, fatisque divisae huic menstruo suspensae inhærere possunt, immo in loco clauso sol-

F

vi,

vi, igne vehementer urgente. Acida nihil valent praeter illud, quod e fluore minerali elicitur ( §. 30. ). Alkalia fixa terram siliceam via humida adgrediuntur, sed peculiari vehementia fufcipiunt via ficca, duplum ejusdem pondus in clarum stabileque vitrum tranfmutantia. Tanta cum alkalibus adfinitas, argillae, filiceo femper onuftae, vim impertit, qua acidi portionem e nitro et muria laxare potis eft. Pura in igne eft refractaria.

Quamvis Terra filicea non fit omnino fimplex, in Mineralogia tamen infar primitivae eft refpicienda, donec e quadam praecedentium ortam monftraverint diftincta experimenta (1).

§. 125.

---

(1) Opusc. Vol. II., pag. 49.

§. 125.

TERRA SILICEA *argillaceo* et *calcareo* parciſſime unita.

CRONSTEDT Min. §. 51. *Quart-  
ſum*.

§. 126.

TERRA SILICEA *argillae* adu-  
nata.

CRONSTEDT Min. §. 57. *Calcedo-  
nius* et forte *Opalus*. *Hydrophanus*  
horum eſt varietas.

Num huc pertineant *Carneolus*,  
*aliique ſilices*, tam *ſubtilioris*, quam  
*rudioris compagis*, an ad praecedentem  
ſpeciem, nondum certo determinare poſ-  
ſum.

§. 127.

TERRA SILICEA *argillae* valde  
*martiali* adunata.

CRONSTEDT Min. §. 63. — 65.  
*Iaspis*.

F 2

§. 128.

§. 128.

TERRA SILICEA *martiali* gravidata.

CRONSTEDT Min. §. 53.

Haec species saepe etiam lāspis vocatur, sed frustra, quum argilla careat.

§. 129.

TERRA SILICEA *argillae* et paulillo *calcis* unita.

CRONSTEDT Min §. 62. *Petroflex.*

§. 130.

TERRA SILICEA *argillae* et paulillo *magnesiae* adunata.

CRONSTEDT Min. §. 66. *Fels-spathum.*

§. 131.

TERRA SILICEA *magnesiae*, *calci aeratae* et *fluoratae*, nec non *cupro ferroque calcinatis* adunata.

Chry-

*Crysopterus* vulgo. Hunc nondum  
examinare licuit, sed experimentis  
Dni. ACHARD heic inferendum existimo.

Species terrarum rite determinare  
opus est in tota Mineralogia difficil-  
limum, quum adhuc innumerae rest-  
absolvendae analyfes. Sed, quod jam  
obscurum intricatumque videtur, expe-  
rimentis multiplicatis aliquando planum  
et facile erit.



## CLASSIS TERTIA.

## BITUMINA .

§. 132.

**H**Uc referimus omnia fossilia phlogisto extra modum consuetum turgida, unde etiam fere omnia, uti decet, tractata flammam gignere possunt. Genera heic obvia sunt admodum pauca et adcurate loquendo vix nisi unicum. Sed, quum Phlogiston si adeo subtile, ut solum nostros effugiat sensus, simpliciora ejusdem connubia forte tamquam genera considerare licebit, quod cum metallis universali consensu diu receptum fuit.

SUL-

S U L P H U R .

§. 133.

**H**Oc nomen generatim tribui potest cuivis acido per phlogiston in formam solidam coagulato . Si omnia metalla acido quodam radicali constant, phlogisti ope satiato, uti vero est simillimum et de arsenico extra dubitationis aleam positum, eadem heic locum naturalem invenient. Donec autem haec thesis pluribus fuerit stabilita experimentis, illa tantum conubia sub hoc titulo enumero, quae metallica carent indole.

§. 134.

PHLOGISTON *acido vitriolico* satiaturum .

CRONSTEDT Min. §. 151. *Sulphur vulgare* .

F 4

§. 135.

## §. 135.

PHLOGISTON *acido aereo* satiatum.

CRONSTEDT Min. §. 145, a.

*Plumbago.*

Compositionem genuinam detexit  
D. SCHEELE.

## §. 136.

PHLOGISTON *acido*, tam *vitriolico*, quam *molybdaenae* adunatum, vel, quod eodem recidit, Sulphur cum acido *molybdaenae* conjunctum.

CRONSTEDT Min. §. 154, b,

c. *Molybdaena*.

Acidum *molybdaenae*, quale hactenus potuit, denudari, vix omni phlogisto carere antea demonstravi (§. 32.). Si metallica est originis hoc acidum, *Molybdaena* instar mineralisationis haberi potest et ad mineras referri.

PE-

PETROLEUM.

§. 137.

**P**hlogiston in nexu oleoso etiam inter fossilia occurrit, sed e regno vegetabili illud haud pauci derivant.

§. 138.

PETROLEUM purum et segregatum.

CRONSTEDT Min. §§. 147—150.

§. 139.

PETROLEUM *argillae* inhaerens.

CRONSTEDT Min. §§. 157—160.

*Lithantrax.*

§. 140.

PETROLEUM *acido succini* adunatum.

CRONSTEDT Min. §§. 133.

146. *Succinum.*

Multi e regno vegetabilium or-  
tum

tum contendunt, interea, quam inter fossilia reperiatur et origo nondum factis sit illustrata, huc refero.

§. 141.

Ambram griseam nihil esse aliud, quam succum arboris vaporando inspissatum concretumque D. AUBLET adseverat. Haec arbor in Guyana crescens Cuma adpellatur, a nemine hucusque botanice determinata. Copiosa pluvia in fluvios frustula devehit, quorum specimina a D. ROUELLE examinata, ambrae qua odorem et principales qualitates congrua fuerant (1). Dudum RUMPHIUS Nanarium memorat, arborem, quae succum exhibet Ambrae similem.

ADA-

---

(1) Hist. des Plantes de la Gujane, 1774.

## A D A M A S.

§. 142.

Primo forsan intuitu mihi vitio vertetur, quod a gemmis principem segregem et hęc inferam, at singulis rite pensitatis, magis convenientem locum me ignorare fateor. Nemo hactenus via humida decompone valuit (1), et igni expositus in vase aperto totus consumitur cum nimbo vel flammula, ambitum lambente. Haec deflagratio quamvis lenta, cum inflammabilibus tamen distinctam evincit adfinitatem. Præterea in foco vitri caustici fuliginis exhibet vestigia (2). Nova experimenta, si in posterum meliora docebunt, errorem lubenter corrigam.

CLAS-

(1) Opusc. Vol. II. pag. 112.

(2) *Lavoisier*, Mem. de l'Ac. de Paris.

## CLASSIS QUARTA.

## METALLA.

## §. 143.

Magnam metalla inter et corpora inflammabilia adfinitatem antea tetigi ( §. 133. ) : In limite quasi posita sunt Zincum et Arsenicum, quae igni rite exposita distinctam eructant flammam. Omnia phlogiston foveant, et, ejus certa dosi remota, abeunt in pulverem, terrae similem, in diversis autem inaequalis vis attractiva has connectit materias. Pleraque sub vulgari fusione, aeri atmosphaerico exposita cito in superficie exarescunt et terrestrem porrigunt cremorem, qui in pristinum statum restitui nequit, nisi addito inflammabili. Haec *Ignobilia* vocantur et undecim nostris diebus cognita sunt. In nobi-

*nobilibus* autem, auro, platino et argento, adeo arctus est nexus, ut vulgari fusione, quamvis diutina, nulla observari potuerit calcinatio, et si via humida in calcem mutata igni committantur fusorio, in formam completam reduci queant, sine alio, quam quod calori inest, phlogisto. Medium quasi locum tenet hydrargyrum, nam uti priora, calcinari potest, quamvis aegerri-  
me, sed simul cum posterioribus solo igne metallicam recipere indolem. Quamlibet phalangem secundum gravitates specificas ordino. *Nativa* mihi audiunt metalla, quae forma gaudent completa, *mineralisata* autem, quae acidis vel sulphuri sunt adunata, et *calciformia*, quae phlogisto tantum privata inveniuntur (1).

## AURUM.

(1) Opusc. Vol. II. pag. 275.



## A U R U M.

§. 144.

**M**etallum hocce purum gravitate gaudet 19, 640. Aqua regia solvit, sed praeter acidum fulis dephlogistatum, et in certis circumstantiis nitrosum, nullum acidum simplex aurum adgreditur, nisi antea calcinatum (1). E centenario suscipiendo phlogisti quantitas necessario auferenda per 394. circiter exprimitur, posito, quod argenti centenarius acido nitri solvendus amittat 100. (2). Hoc autem phlogiston, formae completae debitum, pertinacius, quam ullum aliud metallum retinet

---

(1) Opusc. Vol. II. pag. 374. --- 376.

(2) Diff. de quantitate phlogisti in diversis metallis.

net aurum, platino forte excepto. Secundum thermometrum Suecanum caloris gradu  $\dagger$  705. fluit et in foco speculi caustici calcinatur.

§. 145.

AURUM *nativum argento* adunatum.

Quod sciam, non dum perfecte purum repertum est aurum.

§. 146.

AURUM *nativum cupro* adunatum.

§. 147.

AURUM *nativum argento cuproque* simul adunatum.

§. 148.

AURUM *nativum argento, cupro, ferroque* simul adunatum.

§. 149.

AURUM mediante ferro *sulphure* mineralisatum.

CRON-

CRONSTEDT Min. §. 166. a. *Pyrites aureus.*

De mineralisatione auri dubium etiamnum moveri potest (1).

§. 150.

AURUM cum *argento*, *plumbo* et *ferro sulphure* mineralisatum.

*Minera aurifera Nagyayensis.*

Hanc mineram non dum rite examinare licuit (2).

PLA-

(1) Opusc. Vol. II. pag. 411.

(2) Opusc. Vol. II. pag. 413.

PLATINUM.

§. 151.

**M**Axime depuratum gravitatem specificam 18000., attingit. Aqua regis solvit et phlogiston removendum, secundum haecenus instituta experimenta, per 756. exprimendum, separare valet. Praeter acidum salis dephlogisticatum, quod omnia adgreditur metalla nullum menstruum acidum platinum suscipit, nisi antea calcinatum. Vi, qua hoc phlogiston retinet, omnia alia superare videtur, quantum huc usque experiri licuit. Ut lique scat, aestus requiritur illo intensior, qui ferro opus est.

§. 152.

PLATINUM *nativum ferro adunatum.*

G CRON-

CRONSTEDT Min. §. 179.

Quod sciam, numquam sine inquinamento martiali inventum, quo tamen arte liberari potest (1).

AR-

(1) Opusc. Vol. II. pag. 181.

ARGENTUM,

§. 153.

**G**RAVITAS specifica 10. 552. Acidum nitri facillime solvit; vitriolicum ebullitione est juvandum, at muriaticum, quamvis fortius calcem hujus metalli attrahat, non tamen phlogiston, solutionem impediens, remove valet. Quantitatem hujus obstaculi, quae differentiam inter metallum completum et ejusdem calcem efficit, dudum per 100. in centenario expressi. Ipsa autem vis, qua argentum hanc inflammabilis portionem retinet, illi proxime est inferior, quae in auro reperitur, hoc est, locum tertium occupat in serie omnium metallorum. Gradu caloris † 538. fluit.

§. 154.

ARGENTUM *nativum auro adu-*

*natum.*

G 2

§. 155.

§. 155.

ARGENTUM *nativum cupro* adunatum.

§. 156.

ARGENTUM *nativum auro cuproque* simul adunatum,

§. 157.

ARGENTUM *nativum ferro* adunatum.

Ferrum vix umquam  $\frac{2}{100}$  excedit, sed plerumque  $\frac{1}{100}$  non attingit.

§. 158.

ARGENTUM *nativum arsenico* adunatum,

Arsenicum vix  $\frac{5}{100}$  excedit.

§. 159.

ARGENTUM *nativum antimonio* adunatum.

Fu-

Fusum fumat, sed nullus sentitur odor arsenicalis.

§. 160.

ARGENTUM *nativum arsenico ferroque simul adunatum.*

Tria ingredientia metalla aequales circiter massae portiones efficiunt.

Haecenus memoratae species omnes metallica gaudent facie et indole. Inquinamenta non numquam sunt valde exigua, non tamen negligenda, quam plerumque massae  $\frac{1}{300}$  excedant.

§. 161.

ARGENTUM *acidis muriatico et vitriolico simul mineralisatum.*

CRONSTEDT Min. §. 177. *Minera argenti cornea.*

Acidi vitriolici praesentiam dete-

G 3 xit



xit D. WOULFK (1). Argentum  $\frac{70}{100}$   
raro excedit. Num alicubi acido vi-  
triolico omnino careat ignoro.

§. 162.

ARGENTUM *acidis muriatico et*  
*vitriolico*, nec non *sulphure* simul mi-  
neralifatum.

Num vere distincta sit haec spe-  
cies adhuc dubito, quum vix nisi me-  
chanicum sit connubium sulphuris et  
salium.

§. 163.

ARGENTUM *sulphure* mineralifa-  
tum.

CRONSTEDT Min. §. 169. *Mine-  
ra argenti vitrea.*

Argentum  $\frac{75}{100}$  et ultra non num-  
quam efficit.

§. 164.

---

(1) Phil. Trans.

§. 164.

ARGENTUM cum *ferro*, *sulphure* mineralifatum.

CRONSTEDT Min. §. 176: 10.

*Pyrites argenteus*.

§. 165.

ARGENTUM cum *plumbo*, *sulphure* mineralifatum.

CRONSTEDT Min. §. 176: 8.

*Galena*.

Argentum paucas in centenario semuncias efficit.

§. 166.

ARGENTUM cum *arsenico*, *sulphure* mineralifatum.

CRONSTEDT Min. §. 170. *Mine-*

*ra argenti rubra*.

Argentum  $\frac{70}{100}$  circiter efficit. Fer-  
rum interdum desideratur, sed saepe  
inest, ut in plerisque aliis speciebus.

G 4 §. 167.

§. 167.

ARGENTUM cum *ferro* et *arsenico sulphure* mineralisatum.

CRONTFDT Min. §. 172. Germanorum *Weiserz*.

Specimina examinavi Saxonica, quae interdum argento carent. Nam igitur suum nobile contentum argento nativo immixto debeat?

§. 168.

ARGENTUM, cum *ferro*, *arsenico* et *cobalto*, *sulphure* mineralisatum.

Argentum non numquam  $\frac{50}{100}$  superat.

§. 169.

ARGENTUM, cum *cupro*, *ferro* et *arsenico*, *sulphure* mineralisatum.

CRONSTEDT Min. §. 171. *Mine-ra argenti alba* vulgo audit.

Contentum argenteum quantitate mul-

multum variat,  $\frac{10}{100}$  interdum attingens, immo superans.

Egena *Minera argenti grisea* vocari solet.

§. 170.

ARGENTUM, cum *cupro*, *ferro*, *arsenico* et *antimonio*, *sulphure* mineralisatum.

CRONSTEDT Min. §. 173: 6.

*Minera argenti grisea* in Dalia.

Cuprum  $\frac{24}{100}$ , argentum  $\frac{5}{100}$  raro attingit.

§. 171.

ARGENTUM, cum *ferro*, *arsenico* et *antimonio*, *sulphure* mineralisatum.

CRONSTEDT Min. §. 173: 5.

Germanorum *Federerz*.

Argentum aliquot semuncias in centenariis vix excedit.

E ma-

E matricum varietate diversas formare species absonum existimo. Hae alibi et seorsim considerentur oportet.

---

HY-

---

## HYDRARGYRUM.

§. 172.

**G**RAVitate specifica gaudet 14, 110, metallis fragilibus irrito adnumeratum; nam frigore 280 graduum rigescit et in hoc statu malleo obedit fere uti plumbum. Quum autem tanta caloris privatio in nostro globo rarissime nisi per artem sit obvia, cur fere semper liquidum vel potius fusum maneat, mirari desinamus.

Acidum nitri facillime solvit, vitriolicum ebullitione est juvandum, et muriaticum omnino nihil valet, nisi antea in centenario phlogisti quantitas, 74. circiter aequivalens, auferatur. Respectu autem attractionis, qua haec portio retinetur, hydrargyrum quarto loco est collocandum, hoc est ignobilibus validius, nobilibus autem debilius.

§. 173.

§. 173.

HYDRARGYRUM *nativum*.

CRONSTEDT Min. §. 217.

Nam re vera omni careat inquinamento metallico, mihi non dum experiri licuit.

§. 174.

HYDRARGYRUM *argento* adunatum.

CRONSTEDT Min. §. 217.

§. 175.

HYDRARGYRUM *acidis muriac* et *pitrioli* mineralifatum.

Hanc detectam mineralifatione etiam D. WOULFE debet Mineralogia.

§. 176.

HYDRARGYRUM *sulphure* mineralifatum.

CRONSTEDT Min §. 218. *Cinnabaris*.

§. 177.

§. 177.

HYDRARGYRUM , cum *ferro*  
*sulphure* mineralifatum.

Dubius haereo , num haec sit di-  
stineta species. Forte martiale tantum  
mechanice inhaeret.

§. 178.

HYDRARGYRUM , cum *cupro* ,  
*sulphure* mineralifatum.

CRONSTEDT Min. §. 219.

PLUM-



PLUMBUM.

§. 179.

**G**RAVITAS specifica 13., 352., maxima ignobilium. Acidum nitri optime solvit, muriaticum difficiliter, et aegerrime vitriolicum; quum vitriolum ortum aquam respuat, ideoque metallum solvendum incrustet. Debilissima vegetabilium acida etiam suscipiunt, in primis calcinatum, dulcem adquirentia saporem. Phlogiston in centenario removendum ut solutio locum habeat, qua copiam per 43. indicari potest, quae minor est quam in ullo alio metallo. Hinc intelligitur cur calx plumbi parcissimo inflammabili reduci queat. Ratione virtutis illud retinentis, locum decimum occupat. Calore † 313. funditur.

§. 180.

§. 180.

Plumbum *nativum* num reperiatur adhuc dubitant plerique Mineralogi.

§. 181.

PLUMBUM *acido vitriolico* mineralisatum. Raro occurrit e fatifcente galena ortum. A D. MONNET primo observatum. In acidis non effervescit. Flamma in carbone reduci potest.

§. 182.

PLUMBUM *acido phosphori* mineralisatum.

A D. GAHN detectum. In acidis non effervescit: in carbone ope tubi ferruminatorii fundi potest, sed non reduci in statum completum.

§. 183.

PLUMBUM *acido aereo* mineralisatum.

§. 184.

In acidis effervesceit et in carbone facile reducitur (1).

§. 184.

PLUMBUM *sulphure* mineralisatum.

CRONSTEDT Min. §. 187.

§. 185.

PLUMBUM, cum *argento*, *sulphure* mineralisatum.

CRONSTEDT Min. §. 188.

§. 186.

PLUMBUM, cum *argento* et *ferro*, *sulphure* mineralisatum.

CRONSTEDT Min. §. 189.

§. 187.

PLUMBUM, cum *argento* et *antimonio*, *sulphure* mineralisatum.

CRONSTEDT Min. §. 190.

CU-

(1) Opusc. Vol. II. pag. 426.

CUPRUM.

§. 188.

**G**ravitas specifica 8., 876. Acidum nitri egregie solvit, muriaticum tarde et vitriolicum intensa ebullitione est juvandum, antequam phlogiston impediens tolli queat, cujus quantitas per 312. in centenario, more in praecedentibus consueto, exprimitur. Debilissima vegetabilium acida illud etiam adgrediuntur, praesertim calcinarum, nec non alkalia, in primis volatile. Respectu vis, inflammabile retinentis, cupro octavus competit locus. Calore † 788. grad. liquefcit.

§. 189.

CUPRUM *nativum*.

CRONSTEDT Min. §. 193.

Raro sine omni inquinamento au-

H ri,

ri, argenti vel ferri inveniri credo, sed non dum rite examinare licuit.

§. 190.

CUPRUM phlogisto simpliciter spoliatum\*.

CRONSTEDT Min. §. 195.

§. 191.

CUPRUM cum argilla, acido muriatico mineralisatum.

D. WERNER in sua versione Mineralogiae Cronstedtianae, parte prima et pag. 217., illud accurate descripsit, mihiq; portiunculam benevole misit, qua occasio data fuit, illam chemice explorandi (1).

§. 192.

CUPRUM acido aereo mineralisatum.

CRON-

---

(1) Opusc. Vol. II., pag. 431.

CRONSTEDT Min. §. 194. ;  
196. b.

Genuinam indolem primus indagavit D. FONTANA. Contentum cuprum  $\frac{2}{3}$  circiter efficit, acidum aereum  $\frac{1}{4}$  —  $\frac{1}{3}$ . Paullum aquae etiam inest (1).

§. 193.

CUPRUM *sulphure* mineralisatum.

CRONSTEDT Min. §. 197) *Minera cupri vitrea* vulgo, sed inepte.

Raro sine omni inquinamento martiali occurrit.

H 2 §. 194.

(1) Opusc. Vol. II., pag. 419.

§. 194.

CUPRUM cum *parciori ferro*,  
*sulphure mineralisatum*.

CRONSTEDT Min §. 198.  $\beta$ .  
*Minera cupri lazura*.

Per *parcius* ferrum quantitatem  
intelligo, quae cupram non superat,  
uti per ferrum uberius, quae cuprum  
pondere excedit. Cuprum heic 40.  
vel 50. massae centesimas plerumque  
efficit.

§. 195.

CUPRUM, cum *ubcriore ferro*,  
*sulphure mineralisatum*.

CRONSTEDT Min. §. 198.,  $\gamma$   
*Pyrites cupri*.

Contentum cupreum multum va-  
tiat, sed  $\frac{40}{100}$  vix excedit.

§. 196.

§. 196.

CUPRUM, cum *ferro* et *arsenico*, *sulphure* mineralisatum.

CRONSTEDT Min. §. 198., a.

*Minera cupri grisea*.

Inquinamentum argenteum saepe  
adeft. Cuprum  $\frac{60}{100}$  vlx excedit.

H 3

FER-



F E R R U M.

§. 197.

**G**Ravitas specifica 7., 800. Omnia acida hoc metallum facile suscipiunt, vitriolicum autem dilutum sit oportet, alias sine ebullitione, ad siccum fere continuata, nihil efficitur. Phlogiston in centenario ferri ductilis removen- dum, secundum experimenta hactenus instituta, per 342. designari potest, et adeo debili vi retinetur, ut hoc metallum cum paucis aliis undecimum seu ultimum teneat locum. Fusioni in- tensus caloris gradus est necessarius, nempe † 872., si justa est huc usque usitata comparatio Theremometri mer- curialis cum metallico MORTIMERI, Gradibus † 566. ignitum rubet.\*

§. 198.

§. 198.

FERRUM *nativum*.

Quod ingens illa ferri massa, e Siberia a D. PALLAS in Europam allata, naturae manu sit producta, aegre in dubium vocari potest. Compositio-  
ne hoc cuso congruit, nam e centenario ope acidi muriatici 49. aeris inflammabilis exhibet pollices cubicos, at ferri ductilis limites, e pluribus deducti experimentis, inter 48. et 51. cadunt (1).

§. 199.

FERRUM nativum *arsenico* adunatum.

CRONSTEDT Min. §. 243., B.

*Misspickel* vulgo dictum.

Ferrum duas tertias plerumque

H 4 effi-

(1) Diff. de Analyfi ferri.

efficit, sed, ope arsenici, praesentis, magnetis imperio liberatur.

§. 200.

FERRUM aliud ferrum *attrahendi virtute* instructum.

CRONSTEDT Min. §. 211. b.

*Magnes.*

Haecenus materialis causa latet.

§. 201.

FERRUM ea gaudens *phlogisti* quantitate, ut magneti obediat.

CRONSTEDT Min. §§. 212.,

213.

Haec quantitas cum illa minime compareretur, quae ductilitati est necessaria, nam centenarius haud raro vix ultra 3. porrigit pollices cubicos aeris inflammabilis.

§. 202.

FERRUM *calciforme*, phlogisto simpliciter spoliatum.

CRON-

CRONSTEDT Min. §§. 302--206.

§. 203.

FERRUM, cum *magnesio* et terra  
*calcareo*, *acido aereo* mineralisatum.

CRONSTEDT Min. §. 30. *Mine-*  
*ra ferri alba* (1).

§. 204.

FERRUM *sulphure* mineralisatum.

CRONSTEDT Min. §. 152. *Py-*  
*rites*.

§. 205.

FERRUM *novo metalla fragili*, vel  
peculiari ferri modificatione frigidam  
frigilitatem provocanti, intime uni-  
tum.

In ferro, quod vulgo frigidum  
fragile audit, metallum adest fragile,  
ferro ductili ope ignis facillime adu-  
nandum, et fragilitatem frigidam ad-  
ferens.

---

(1) Opusc. Vol. II., pag. 184.



ferens. Hoc acidis solutum cum alkali phlogificato caeruleum Berolinense generat, sed magneti non obedit et calcem praebet albam, phlogisti ditio-  
rem, quam ferri boni calx flava. Plu-  
ribus experimentis intimiorem cogni-  
tionem cito adquisitionem iri spero.

§. 206.

FERRUM *calciforme* modo pecu-  
liari *phlogificatum*.

CRONSTEDT Min. §. 208. *Caeruleum Berolinense nativum*.

Argilla et humus non nunquam colore caeruleo diluto in superficie decorantur, immo prior recens effossa aërique exposita hunc tinctum interdum adquirere inventa est. Quod basis sit martialis, phlogisto gravidata, facile patet, nam ignitione in carbone flammulam monstrat, rubescit et magneti fit obsequiosum. Leni calore eadem  
ma-

matera virescit, fusione autem nigras exhibet scorias. Tam alkalia, quam acida pulverem caeruleum suscipiunt coloremque delent, qui tamen iterum comparet, si e prioribus per acida et e posterioribus per alkali praecipitatio instituitur, at plerumque virescens et cito albescens. Hoc sedimentum albidum, infuso theae vel gallarum immersum, pristinum colorem recuperat. Ex allatis elucet, quod hoc pigmentum, licet artificiali analogon, ab illo tamen differat intensitate, generationis modo, variisque proprietatibus. Cum aqua color fervatur, sed cum oleo nigrescit.

STAN-

STANNUM.

§. 207.

**G**ravitas specifica 7., 264. Acidum salis, nec non vitrioli, aqua regis et acetum solvunt, si rite adhibentur, sed nitrosum, praesertim forte, adeo vehementer adgreditur, ut brevi in calcem insolubilem corrodatur metallum. Quantitas phlogisti necessario auferenda, ut solutio fieri possit, per 114. designatur, et tanta vi retinetur, ut stanno nonus competat locus. Excepto hydrargyro facillime fluit, non nisi gradum † 213. requirens.

§. 208.

STANNUM *nativum*.

Tale non dum ipse vidi. Nonnulli

nulli etiamnum de genuina indole dubitant, et forsan non sine ratione.

§. 209.

STANNUM *calciforme, martiali*  
inquinatum.

VSIMU-



# VISMUTUM.

§. 210.

**G**ravitas specifica 9., 670. attingit, adeo ut inter metalla fragilia, quae jam sequuntur, sit ponderosissimum. Acidum nitri et aqua regis optime solvunt, vitriolicum ebullitione ad siccum usque est juvandum et muriaticum vix nisi calcem adgreditur. Phlogisti copia, quae menstruis resistit, per 57. indicatur, et vis eam retinens vismuto septimum tribuit locum. Funditur caloris gradu † 257.

§. 211.

VISMUTUM *nativum*.

CRONSTEDT Min. §. 222.

§. 212.

VISMUTUM *calciforme*.

CRONSTEDT Min. §. 223.

Num

Num simpliciter phlogisto spoliatum, an vero simul acido aereo mineralifaturn sit, haecenus ignoro.

§. 213.

VISMUTUM. *sulphure* mineralifaturn.

CRONSTEDT Min. §. 224.

§. 214.

VISMUTUM, cum *ferro*, *sulphure* mineralifaturn.

CRONSTEDT Min. §. 225.

NIC-

## NICCOLUM.

§. 215.

**G**Ravitas specifica reguli depurati 9., 000. attingit, vel forte superat, vulgaris autem, prima reductione acquisiti, 7., 000. parum excedit. Acidum nitri et aqua regis optime solvunt; muriaticum tarde; vitriolicum ebullitione ad siccum fere est juvandum et acetum non nisi calcinatum adgreditur metallum. Quantitas phlogisti auferenda per 156. designatur, eademque circiter vi retinetur, qua ferrum suum tuetur inflammabile (§. 197.) Calor fusioni necessarius illi proxime accedere videtur, quo aurum fluit, sed depuratum vix ferro facilius lique-

liquefcit. Indoles alibi fufius examina-  
ta reperitur (1).

§. 216.

NICCOLUM *nativum*, *ferro arse-  
nicoque* adunatum. Interdum forte fi-  
mul inest cobaltum. Dum et sulphur  
omne et acidum mineralifans deficit,  
metallum, completa inftitutum forma,  
nativum jure audit, etfi peregrinis  
metallis contaminatum.

§. 217.

NICCOLUM *acido aereo* minera-  
lifatum.

CRONSTEDT Min. §. 255.

§. 218.

NICCOLUM cum *ferro*, *cobalto*  
et *arsenico*, *fulphure* mineralifatum.

CRONSTEDT Min. §. 256.

*prum nicotai* vulgo.

I

AR-

---

(1) Opusc. Vol. II., pag. 231.

ARSENICUM.

§. 219.

**G**ravitas specifica acidit radicalis 3., 391. arsenici albi 3., 706., ejusdem vitriformis 5., 000. et. reguli 8., 308. Acidum muriaticum et aqua regis optime solvunt, vitriolicum ebullitionem requirit, acetum calcem unice adgreditur, sed nitrosum non tantum phlogisti copiam per 109. designatum auferet, qua privatione in calcis formam redigitur regulus, sed etiam iusta dosi, idoneo juvanda caloris gradu, ipsam calcem eo usque dephlogisticare valet, ut tandem liberum proceat acidum arsenici. Maxime notabilia sunt haec phaenomena, quippe quae metallorum indolem generatim denudare videntur. Scilicet analogiae

logiae congruenter quodvis metallum radicem fovet acidam peculiaris naturae, quae certa inflammabilis portione in calcem metallicam coagulatur, uberiore autem et saturante in completum abit metallum. Acidum vero radicale longe fortius retinet phlogiston coagulans, quam quod de in saturationi est necessarium. Diverfa tamen acida metallica inaequalibus viribus utrumque attrahunt. Hinc nobilia metalla viâ sicca vix ac ne vix quidem calcinari possunt, solis menstruis acidis in hanc redigenda formam, reliqua autem omnia phlogiston saturans igne fugari sinunt, quanvis plus minus dif-  
ficulatis pariant. Diverfos resistentiae gradus undecim distinctos observavi. Aurum nemque omnibus aliis praecipitatur metallis, excepto forte Platino, quod ita explicandum existimo. Calx auri vi majoris attractionis phlogiston

singulis eripit et hoc ipso solubilitatem amittit, reducta decidens. Itaque auro in serie metallorum saltem secundus competit locus. Platinum deijcitur omnibus, auro tamen minus distincte, illi igitur, ni fallor, primus tribui debet, et sic porro, ut in charactere cujuslibet metalli adnotavi. At niccolum, cobaltum, ferrum, magnesium et zincum se invicem non deturbant, quae ideo ultimum et undecimum occupant (1).

Ut nuda prodeant acida radicalia nexus phlogisti coagulantis est superandus. Si huc umquam pertingit chemicorum industria Metallurgiam simul mirum in modum dilucidatum iri confido. Hoc opus, hic labor. Analogiae  
caute

---

(1) Diss. de quantitate phlogisti in metallis.

caute fidendum scio, sed novis saltem experimentis ansam praebeat oportet. Haftenus cum arsenico tantummodo successit operatio, et notatu dignum est, quod hoc metallum, cui ratione phlogisti saturantis quintus competit locus, omnibus cedat, respectu attractionis, quae portionem coagulantem figit.

Funditur, sed momento necessariae ignis intensitati exponendum, ne antea calcinatum avolet. In ferri laminam rite calefactam demissus regulus accenditur et mox calcinatur, odorem spargens alliaceum (1).

§. 220.

ARSENICUM nativum ferro, adunatum.

CRONSTEDT Min. §. 239.

I 3

Non

(1) Opusc. Vol. II., pag. 227.



Non dum martiali inquinamento  
liberum inveni.

§. 221.

ARSENICUM *nativum argento*  
*adunatum.*

§. 222.

ARSENICUM *calciforme*, phlogi-  
sto simpliciter privatum.

CRONSTEDT Min. §. 240.

§. 223.

ARSENICUM *sulphure minerali-*  
*fatum.*

CRONSTEDT Min. §. 241. *Au-*  
*ripigmentum, Risgallum.*

§. 224.

ARSENICUM *cum ferro, sulphu-*  
*re mineralifatum.*

CRONSTEDT Min §. 243. A. *Py-*  
*rites arsenicalis.*

COBALTUM.

§. 225.

Gravitate specifica 7., 700. Acidum nitri et aqua regis facillime solvunt, vitriolicum ebullitionem ad siccum fere requirit, muriaticum vero et acetum sine praevia calcinatione nihil valent. Phlogiston saturans per 270. designatum, eademque retinetur vi, qua ferrum suum tuetur. Vulgaris regulus eodem circiter gradu caloris ac cuprum fluit, at probe depuratus vix ferro facilius perdomatur.

§. 226.

COBALTUM *nativum* et *arsenico* adunatum.

CRÖNSTEDT Min. §. 249.

§. 227.

COBALTUM *calciforme*.

I 4

CRON-

CRONSTEDT Min. §. 247.

Peregrinā varia immixta reperiuntur, arsenicalia praesertim, ferrea vel cuprea, sed haecenus ignoro, num tantum mechanice, an vero intimiore nexu inhaereant.

§. 228.

COBALTUM *acido arsenici mineralifatum.*

CRONSTEDT Min. §. 248.

Exiguæ, quibus huc usque experiri licuit, portiones talem innuunt naturam (1).

§. 220.

COBALTUM, cum ferro, *acido vitriolico contaminatum.*

CRONSTEDT Min. §. 250.

§. 230.

(1) Opusc. Vol. II., pag. 446.

§. 230.

COBALTUM, cum *ferro*, et *arsenico*, *sulphure* mineralisatum.

CRONSTEDT Min. §. 251.

§. 231.

COBALTUM, cum *ferro*, *arsenico* et *niccolo*, *sulphure* mineralisatum.

CRONSTEDT Min. §. 252.

ZIN-

## ZINCUM.

§. 232.

GRAVITAS specifica 6., 862. Omnia acida solvunt facile et cum effervescentia; quod hunc metallo principium inflammabile laxissime inhaerens innuit, uti etiam supra dudum notatum est (§. 219.). Ejus autem e centenario removenda quantitas per 182. designatur. Calore  $\frac{1}{2}$  371. graduum liquefit, et, hoc paulum aucto, inflammatur metallum, flores spargens albos (1).

§. 233.

ZINCUM *calciforme*, phlogisto simpliciter spoliatum.

CRON-

---

(1) Opusc. Vol. II., pag. 309.

CRONSTEDT Min. §. 228., a.

*Lapis calaminaris.*

Fere semper cum argilla vel ferro calciformi commixtum.

§. 234.

ZINCUM *acido aereo mineralisatum.*

CRONSTEDT Min. §. 228. A., i.

§. 235.

ZINCUM *aeratum filiceo mixtum.*

D. a BORN crystallos mihi misit hujus indolis, quae igni expositae acidum aereum porrigunt, sed non totae quantae acidis solvuntur.

§. 236.

ZINCUM, cum ferro, sulphure mineralisatum.

CRONSTEDT Min. §§. 229.,

230. *Pseudogalena.*

AN.

# ANTIMONIUM.

## §. 237.

**G**Ravitas specifica 6., 860. Aqua regis egregie solvit, acidum vitriolicum ebullitione requirit, muriaticum et acetum parum vel nihil valent, nisi praecedat idonea calcinatio, nitrosum autem ita corrodit, ut deinde solutionem respuat. Phlogisti saturantis copia, quae e centenario solvendi auferri debet, per 120. indicatur, et respectu pertinaciae, qua retinetur, antimonio sextus competit locus. Gradibus caloris † 432. funditur.

## §. 238.

ANTIMONIUM *nativum*.

CRONSTEDT Min. §. 233.

## §. 239.

ANTIMONIUM *sulphure mineralisatum*. CRON-

CRONSTEDT Min. §. 234.

§. 240.

ANTIMONIUM cum *arsenico sulphure* mineralitatum.

CRONSTEDT Min. §. 235.



MAGNESIUM.

§. 241.

GRAVITAS specifica 6., 850. Acida omnia hoc novum metallum solvunt, quod phlogisto saturante adeo facile spoliatur, ut cum ferro aliisque nonnullis locum occupet ultimum. Portio e centenario solvendi acidis removen- da per 227. designatur. Difficillime funditur et hoc respectu ipsum ferrum superare videtur (1).

§. 242.

MAGNESIUM *calciforme*, phlogi- sto simpliciter privatum.

CRONSTEDT Min. §. 114.

§. 243.

§. 243.

(1) Opusc. Vol. II., pag. 201.

§. 243.

MAGNESIUM *acido aereo* mineralisatum.

CRONSTEDT Min. §. 115., 1., 2.

AP-

## APPENDIX PRIMA.

### §. 244.

**I**N antecedentibus simpliciora con-  
nubia occurrunt, quorum principia aut  
chemice sunt conjuncta, aut saltim  
adeo subtiliter irretita, ut compages  
appareat perfecte homogenea. Si au-  
tem horum duae pluresve species, di-  
stinctas efficientes massulas, coagmen-  
tantur, hae mechanicae miscelae, ocu-  
lis discernendae, novam constituent  
oportet phalangem, e suis principiatis  
principiis dijudicandam, uti haec e  
primitivis. Talia composita, e nostra  
Sciagraphia forsan jure proscribi pos-  
sent, at ob insignem usum tam phy-  
sicum et oeconomicum, quam metal-  
lurgicum, levem hujus appendicis pro-  
ponam

ponam delineationem, et notabiliora enumerabo genera.

§. 245.

Generatim patet huc quodammodo referri posse non tantum plures species coalitas, sed etiam discretas, quae instar pulverum sunt commixtae et Terrarum nomine vulgo insigniuntur.

§. 246.

E combinationum doctrina elucet, secundum fossilium in quatuor classes digestionem, 10. tantum genera esse possibile, e duobus composita principiis, 4. e tribus et 1. e quatuor. Quamvis totidem nondum sint detecta, heic tamen singula memoranda existimo, si forte plura indagare valet longioris aevi industria. Species e diversitate specierum simpliciorum et componentium sunt formandae.

K

SA-

SALINUM cum *Salino*.

§. 247.

Hoc connubium raro peculiare constituet genus, si concrefcentia requiritur sicca, nam praeter gypsum reliqui sales nativi facile aqua suscipiuntur et evaporando aliis ita immiscentur, ut massulas discrenibiles aegre offerant. Alkali tamen minerale cum immixta muria heic forte locum reperiet. Ceterum contenta aquarum naturalium huc referri possunt; quum differentia materialis a particulis pendeat solutis.

SALINUM cum *terrestri*.

§. 248.

Haec miscela vix alibi inveniri potest, quam ubi gypsi frustula cum aliis terrenae indolis sunt concreta.

SA-

SALINUM cum *bituminoso*.

§. 249.

Inter vulcania forte quaerendum .

SALINUM cum *metallico* .

§. 250.

Si gypsum metalli cujusdam matricem constituit , minera illa huc pertinet ,

TERRESTRE cum *terrestri* .

§. 251.

Huc pertinent pleraque a D. CRONSTEDT enumerata *Saxa*, quae ingentes montium moles constituent, ideoque sollicitè sunt consideranda, ut corticem telluris qua structuram et indolem cognoscamus, minerarum involucra indagemus, singulaque in nostros convertamus usus .

K 2

TER-

TERRESTRE cum *bituminoso*.

§. 252.

Massulae picis montanae lapidibus non raro inhaerent: sulphuris species terrenis materiis irretitae inveniuntur.

TERRESTRE cum *metallico*.

§. 253.

Hoc genus praecipuas *metallorum matrices* comprehendit, quarum idonea digestio monticolis foret valde utilis.

BITUMINOSUM cum *bituminoso*.

§. 254.

Sulphuris species pici montanae infertae, vel haec illis, alicubi forte occurrant.

BITUMINOSUM cum *metallico*.

§. 255.

Plumbago et sulphur vulgare, si  
ullibi,

ullibi, metallico adnata reperiuntur, hujus generis speciebus adnumerari debent.

METALLICUM cum *metallico*.

§. 256.

Novimus nonnulla metalla in gremio terrae fere semper copulari, alia rarissime vel nunquam in eodem loco reperiri. Adcuratior horum cognitio tam physiographiam, quam metallurgiam illustrat.

Iam ad genera magis composita.

SALINUM cum *terrestri et bituminoso*.

§. 257.

Hoc genus vix alibi occurrere potest, quam in tractibus igni subterraneo olim expositis.

SALINUM cum *terrestri et metallico*.

K 3 §. 258.



§. 258.

Inter producta vulcania quaerendum.

SALINUM cum *bituminoso* et *metallico*.

§. 259.

Inter producta vulcania quaerendum,

TERRESTRE cum *bituminoso* et *metallico*.

§. 260.

Inter vulcani soboles obvium, alibi rarissime,

SALINUM cum *terrestri*, *bituminoso* et *metallico*

§. 261.

Vix extra montes ignivomos inveniendum,

AP-

## APPENDIX SECUNDA.

### §. 262.

**Q**Uae occurrunt fossilia, forma externa animalis vel vegetabilis induta, e peregrinis corporibus ortum ducunt, quae in terrae gremio, vel peculiari modo mutata, vel particulis mineralibus, quae loca putrescentium sensim occupant, ita fuerunt in facta, ut solis tandem figuris organica mentiantur. --- Haec *Petrefacta* vulgo appellantur.

### §. 263.

Crustae animalculorum duriores, atmosphaerae vicissitudinibus expositae, non semper ab interitu sunt immunes, pedetentim namque gelatinoso inhaerente per putrescentiam liberantur, fragiles fiunt et quasi calcinatae. In

K 4      loco

loco magis occluso nonnulla materiae quidem servant indolem, sed texturam adquireunt spathosam.

§. 264.

Probe distinguenda sunt ipsa corpora peregrina mutata vel petrefacta, eorumque ambienti matrici impressa vestigia. Nonnumquam corpus penitus destruitur, cavitatem intra massam obvolventem exhibens, quae alia materia postea oppletur. Reperiuntur quoque nucleï, qui e factura duriorum crustarum oriuntur et harum internum ambitum repraesentant.

§. 265.

Abfit, ut petrefactorum cognitionem sterilem parumque utilem pateamus. Considerari namque et debent, tamquam nummi memoriales, naturae manu depositi, in memoriam notabiliorum operationum in construendo tel-  
luris

luris cortice, e quibus tempus et ordo artificii quodammodo dijudicari possunt, dum alia silent monumenta. Hi, ope genuinae interpretationis, suis locis natalibus de pristino superficiei statu, de vastissimo maris imperio et insequentibus vicissitudinibus nos instruunt; sua materia regni mineralis antiquissima stamina recentioraque distinguunt, quae enim numquam petrefacta constituunt, numquam inclusa fovent, animalia sine dubio aetate supetant; figura denique globi nostri, altissimi praesertim maris, incolas indicant.

§. 266.

Petrefacta egregie ordinavit D. CRONSTEDT, cujus methodum ideo retinendum existimamus. Genera et fossilium generibus petita secundum quatuor classes distribuantur, species et speciebus eorundem et varietates e  
cor-

corpore organico mutuandae sunt. En genera haecenus indagata.

CALX SALINA sub *forma organica*,  
§. 267.

Petrefacta gypsea sunt rarissima.  
FERRUM SALINUM sub *forma organica*.

§. 268.

Corpora humana non numquam vitriolico martiali penetrata indurataque reperiuntur, quod etiam de plantis, praesertim radicibus valet. In libero aere sensim concidunt.

CALX AERATA sub *forma organica*,  
§. 269.

Pleraque huc pertinent Petrefacta.  
ARGILLAI sub *forma organica*.

§. 270.

Notatu dignissimum est phenomenon, quod petrefacta argillae inhaerentia sunt depressa, — quamvis in strato  
subja-

subjacente calcareo naturalem fervent  
ambitum. Similis depressio etiam in  
Schisto margaceo observatur.

**TERRA SILICEA** *sub forma organica.*

§. 271.

Petrefacta filicea interdum occur-  
runt, saepius tamen haec materia  
nucleos constituit (§. 146.). Trunci  
arborum achatini interdum occurrunt.  
In Iaspide et Petrofilice petrefacta vi-  
dit Cel. FERBER et Porpitas ni zinnopel  
Ill. A BORN.

**TERRA organica.**

§. 272.

Tam animalia quam vegetabilia  
putrescendo in terram resolvuntur,  
quam sub peculiari genere considerare  
liceat, donec omnibus deletis organi-  
smi vestigiis tandem vulgaribus adnu-  
merari queat.

**PETRO-**

PETROLEUM *corpora organica im-*  
buens.

§. 273.

Lignum petroleo indurato pene-  
tratum lithantracis egregiam effert va-  
riationem.

ARGENTUM sub *forma organica*.

§. 274.

Argentum quidem nativum petre-  
factis non numquam inhaeret, sed  
numquam, quod sciam constituit, nisi  
cum cupro ope sulphuris mineralisa-  
tum.

HYDRARGYRUM sub *forma organica*.

§. 275.

Sulphure mineralisatum raro pe-  
trefacta constituit.

CUPRUM sub *forma organica*.

§. 276.

Ossa et dentes calce cupri cae-  
rulescente non numquam turgent. Py-  
ritae

ritae cuprei frustula petrefactis inhaerent, rarissime tota constituunt: in matrice magnetica talia e Norvegia possideo.

FERRUM sub *forma organica*:

§. 277.

Ferrum calciforme truncos et radices arborum qua formam non nunquam refert. Sulphure mineralisatum saepe petrefacta inquinat, vix tota constituit.

ZINCUM sub *forma organica*:

§. 278.

Pseudogalenam sub forma corallii vidi.

§. 279.

Recentiorum nonnulli cum D. CRONSTEDT *Vulcania producta* in peculiari appendice quoque enumerant, sed, ni fallor, frustra. Quae naturae manu sunt



sunt formata, sive humida, sive sicca infervivit via, conjungi debent, non enim raro utramque simul adhibet. Et multa sane adeo sunt ambigua, originisque adeo oblitterata vestigia, ut ne Oedipus quidem certo determinare posset, qua via prodierint, Urgent denique haud pauci regnum minerale totum. vel saltim qua maximam partem, ignis esse sobolem. Ne igitur feducamur, secundum principia constitutiva in *ordinem* redigantur fossilia, compositio namque experimentis idoneis nudari potest, raro genesis. Homogenea sub primitivis, quae autem distincte ab illis coagmentata sunt, inter saxa vel alibi in appendice prima locum inveniunt aptum.

IN-

# INDEX

P	Raefatio .	pag. 3.
	De ordinando systemate Mineralogico naturali .	7.
	<u>Classes Fossilium .</u>	<u>18.</u>
	<u>Classis I. Sales .</u>	<u>21.</u>
	<u>Sales neutrales .</u>	<u>34.</u>
	<u>Sales medii terrestres .</u>	<u>42.</u>
	<u>Sales medii metallici .</u>	<u>47.</u>
	<u>Sales triplices .</u>	<u>49.</u>
	<u>Classis II. Terrae .</u>	<u>53.</u>
	<u>Terra ponderosa .</u>	<u>57.</u>
	<u>Calx .</u>	<u>63.</u>
	<u>Magnesia .</u>	<u>71.</u>
	<u>Argilla .</u>	<u>75.</u>
	<u>Terra Silicea .</u>	<u>81.</u>
	<u>Classis III. Bitumina .</u>	<u>86.</u>
	<u>Sulphur .</u>	<u>87.</u>
	<u>Petroleum .</u>	<u>89.</u>

Ada-

<i>Adamas .</i>	91.
<i>Classis IV. Metalla .</i>	92.
<i>Aurum .</i>	94.
<i>Platinum .</i>	97.
<i>Argentum .</i>	99.
<i>Hydrargyrum .</i>	107.
<i>Plumbum .</i>	110.
<i>Cuprum .</i>	115.
<i>Ferrum .</i>	118.
<i>Stannum .</i>	124.
<i>Vismutum .</i>	126.
<i>Niccolum .</i>	128.
<i>Arsenicum .</i>	130.
<i>Cobaltum .</i>	135.
<i>Zincum .</i>	138.
<i>Antimonium .</i>	140.
<i>Magnesium .</i>	142.
<i>Appendix prima .</i>	144.
<i>Appendix secunda .</i>	151.

F I N I S .



005655199



